

# **Wahyu We Yohanesi**

*Kaiwo dedung we Wahyu We Yohanesi*

Kaiwo anatu nei mani kariri fi fubao Yesus Kristus deinawiai we ne inontaraio wonong fino Yohanesi. Ampefe Yohanesi nani soi kaririai.

Rabuang bo soi kaiwofo mani inontarai Kristen fosa esodai dadira paria weo eroaso Seng Yesusi fefe. Na rahida bonani mani parenta Roma foi demi we kaiwasafoi kiai we esomi we mananu Roma foi, mano esahui we Kaisari, ambori esahui we ene seng dine. Wape inontarai Kristen fosa wiro esomi wei kaha, mae esomi terai we Seng Yesus Kristusi, pariao parentafoi miunsa kontai. Wape Kristen manea siai fosa ematai tuti esu to fui weru ene eroasoaf. Yohanesi soi kaiwo anatu nei wesa ambori ewemambiriu aha weo etoaria mutu na eroaso Yesusi fo.

Fi fuba na kaiwonei wefiainaawiai ete fiatioai, amani fio Seng Yesus Kristusi deinawiai we Yohanesi we detioai. Na kaiwone mani soi na kaiwo netawea fea bitoya paria, ambori fio kasau kaharai fo, na rahida bo kawariaifa fo, kasau we tata ki. Finani kiai inontarai eroaso fosa nafafong nanai ewaitawanai, wape na fui nini mani wiro kasau we tata kaha. Wape fio kasau mani, masino inontarai Kristen ne tata tasodai dadira bitoya na nunei, tonana ki wape tasu to fui fanai, taroaso Yesusi mutu tuti tarariati pampang ki. Weo na fui wana mani Seng Yesusi ambori miungno ne aitetafosa kiai tuti wemananu we

nunei sentenang. Tuti tata kontai tawemananu riat i rai.

### **Kaiwo na suratinei deto kutuai tonina:**

1:1-4 Kaiwo reantenang.

1:9-3:22 Fiatioai bo reantenang foi.

1:9-20 Yesusi atioai we Kaisung Inontaraio doa rahana i na pelita aweng itu fo.

2:1-3:22 Yesusi ne kaiwo medurai we jemati-fosa na bendari itu fo.

4:1-16:21 Fiatioai bo boru foi.

4:1-5:14 Yesusi, Domba Antungno doa rurang Allai ne kadera mananu foi na rorafaisi.

6:1-8:5 Domba Antung foi fiosabu segeli itu fo.

8:6-11:19 Wewaifosa ebui songgeri itu fo.

12:1-16:21 Fiainawiai ituo deinawiai kariri fio ambori kawaria fo.

17:1-21:8 Fiatioai bo botoru foi.

17:1-19:20 Yohanesi deti wiwing diru manei, wonong fino Babeli.

19:11-21:8 Yesusi kia wariai we mano dautai na kuda tuti kiraikobuo ne aitetafosa kiai.

21:9-22:5 Fiatioai bo boa foi.

Yohanesi deti kadawingno Domba Antung foi dauti fi, wonong fino Yerusalem Waworu.

22:6-21 Kaiwo Wefuiai.

### *Kaiwo kariri bukunei*

<sup>1</sup> Kaiwo na bukunei mani dotu kariri fio Yesus Kristusi deinawia fo, amani fio Allai dohonai we Yesus Kristusi ambori deinawiai we ne womingnesa, kariri fianai aino katu mani kawaria fo. Ampafe Kristusi demi ne wewaifoi da we ne woming Yohanesia we deikariri fi ambori kawariai nanai

wei.\* <sup>2</sup> Yohanesi deiriri kariri fifuba deti teri na urengfo nani kiai, amani kariri Allai Kaiwo medura fo tuti kariri fio Yesus Kristusi deinawiai weia fo. <sup>3</sup> Weo waroi ahang kahai mae fininai kiai ambori kawariai ki. Mano deto kaiwo kariri fi ambori kawaria fo ninai mani, Allai mioani ki. Tuti mano etaramioai esoniai na enemirorongfoi tuti etohong kariria fosa, ea kontai Allai mioansa ki.

### *Yohanesi dohong mahikaifea we jemati itu fo*

<sup>4</sup> Weo doroi mea na jemati ituo na nu Asia wai mea. Yau Yohanesi yutang we Allai, mano niayai kawuru na reantenang pari foa foi, mano niayai pampang paria sobu rahida bonini, tuti niayai pampang we fitawafa foi, kadono mioang mea, amani dohong ne bengfo arora we mea tuti dohong mea menumiruainso ne maifo. Kadono Allai Nuaninu ituo etoari na arongreaflo, kefang we ne kadera mananu foi fosa, emoang mea kontai. <sup>5</sup> Tuti kadono Yesus Kristusi, mano deiriri kaiwo wetarai fo na mai foi, mano reantenang suwifafong na marareha rorong fo meai, mano wemananu fuba we mananu na nunei fosa kiai foi, kadono mioang mea tonanai kontai.

Yesusi enewawu tata donio mireha we tata ambori na ne rikao tiwowu we tata fo feriri tata werutane sasarinei. <sup>6</sup> Tuti yuai tata we ne inontarai na ne Mananu rorong fo, tuti taweimami we tarufi

\* **1:1** Kaiwo ‘Wahyu’ ne mani, neta we fiainawiai. Ampafe Yesusi dohong wahyu we Yohanesi, nana mani deinawi fi ambori kawaria fo we Yohanesi detioa fo.

we tamangno Allai, amani tane tarai kariri imamifosa, tariwang Allai tamadu ne kaiwofo we kaiwasanei, tuti taha inontarai ene korbani tuti ene nadifo tatohonai we Allai. Yesusi tataparandini tuti todoni kontai andi wemananu we fitawafa ne. Antu!

<sup>7</sup> Mewati, i da na kafafe rorong fo ma ki. Mandoni kontaio ambori detioi ki, mano raminde etisani fosa tuti inontarai siai kontai ambori ewatjoi we da ma fo. Rabuang bonani, kaiwasa fuba nunei kiai ambori ematai tuti esaia etaidu ki. Tarai! Antu!

<sup>8</sup> Seng Allai medu deyo, “Yau mani *Alfa* tuti *Omega* di yau.<sup>†</sup> Yau inayai kawuru na reantennang pari foia foi, tuti inayai pampang paria sobu rahida bonini, tuti inayai pampang we fitawafa foi. Tuti yau iweMananu Fuba Sewa ne.”

### *Yesusi demi Yohanesi we soi kariri fi detioa fo*

<sup>9</sup> Yau Yohanesi, mene doroi na taroasoa Kristus ruhia ne, tuti mano isodai dadira rorong fo toyari mea, tuti toyari mea kontai itawang yau na dadira rorong nanai, weo taminohi na Yesusi ne Mananune. Ehabi yau to nu Patmosi ma iwatai nai, weo iwuwu Allai ne Kaiwo waworu ne, amani kariri todoni kaiwasa esobu fariri na eroaso Seng Yesusi, tuti kaiwo Yesusi medura fo fefe. <sup>10</sup> Tete Sempaisi ne Rahida dine, Nuaninu Mirarebana nei sensoni yau, ainanaya tarahuo manei medu na kuruhune, na rawafui fiabai toyario songgerifi wedotu fenana. <sup>11</sup> Medu we yau deyo, “Fianai aino botioai ninai woi na buku bei tuti bonatuai we jemati itu ninai, amani we jemati na bendari

---

<sup>†</sup> **1:8** Ne tarai kariri A tuti Z na kaiwo ambe.

Efesusi, jemati na Simirna, jemati na Pergamusi, jemati na Tiatira, jemati na Sardisi, jemati na Filadelfia, tuti jemati na Laodikia.”

<sup>12</sup> Ampafe yarabera yau iwati to kuruhufua, we iwati we mandoni dino medu tonanai we yau ne. Ainanaya iwati katai we pelita suang nai itu, finanai enari na emasi kai. <sup>13</sup> Tuti iwati inontarai manei doa rahanai na pelita aweng itu fo, ne tarai toyari Kaisung Inontarai nei. Ansung satari foi fiabai deuroia sobu awerengfo tuti na ne ansung arong fo soru ireu aburung enariri na emasi bei. <sup>14</sup> Nungfoi tuti nurandaungfo bua karofari toyari kafafe bua. Urengfo suru uransairai toyari adia fiabai paria. <sup>15</sup> Awengfo dedori toyario besi kassoia dedori fenanai. Rawafuifoi nubuayai toyari mereha deda na dofiro. <sup>16</sup> Warang domoya foi yu awaha itu tuti sondu reisa kurubong tuti reisa reng bei kiawariai na borongfo. Urengfo sambe-warai toyari wo rahida rabuang.

<sup>17</sup> Na kutu iwatiao nanai, itawai aweu isangkapa awehubuka na arongreafo, nehu tarai toyari inontaraio mireha, wiro ikabera yau ahang kaha. Wape suba warang domoya foi ma yu yau, tuti medu we yau deyo, “Mutai fanai! Yau mani *Reantenang Pari* di yau tuti *Fui Pari* di yau. <sup>18</sup> Tuti mano *Darang Pampang* di yau. Raminde imerehara, wape boti ninaia mani yarang we fitawafa. Aisu we rahutu Marareha rorong fo tuti Soroha rorong fo nayai na warahu rorong ne ampa.

<sup>19</sup> Ampafe woi kariri fianai aino botioai nanai, amani fio kawariai kawurua fo tuti ne ambori kawariai aha fo. <sup>20</sup> Tuti fi toyari kaiwo adiwarai

kariri awaha ituo botioai na warahu domoya fininai tuti pelita aweng itu fo enariri na emasifo mani, deinawi kariri fininai: Awaha itu fo yiwanso wewai ituo ewaitawang wedua jemati itu fo saine. Tuti fi pelita doa nayai itu fo mani deinawio jemati itu fo.”

## 2

### *Kaiwo arerai we jemati na Efesusi*

<sup>1</sup> Mayeai Yesusi medu we yau aha deyo, “Yohanese, woi nehu kaiwo imadura ne we wewai na jemati Efesusi foi tonina:

Mano yu awaha itu na warang domoya foi tuti da rahang pelita aweng ituo enari na emasi fo, ne kaiwo arerai we jematiwai ainina. <sup>2</sup> Iwaitawang kariri fianai aino menari wa ampa, amani merurai merufi paria tuti metawang mea na dadira rorong fe wa, tuti wiro memaya we mewati inontarai eharira fosa euremifo kaha fo. Kontai iwaitawanai kariri todoni merurai we mewaitawang kariri inontarai epampamu we eteyo ea mani rasuli saine fosa. Eteyo emadu fieai na Sempaisi wonongfo wape mewati karirisa sauara ambori mewaitawanai weo ea tonana kaha. <sup>3</sup> Iwaitawanai we wonohunei wedaya mesodai dadirafo, amani mesobu dadira bitoya na Yahudifosa weo mewuwu kariri yau fefe. Wape metawang mea pampang tuti wiro mesu to fui kaha, mae meraria yau pampang. Finani kiai dohong yau iparaise ria mea ampa.

<sup>4</sup> Tonanai ki, wape iparaise kahai we fisarawafeai kontai menari wa, amani wiro menemiwawu yau kariri reantenang meroaso

yau fo ahang kahai. <sup>5</sup> Ampafe mearomioaifa, weo ne tonanane wedaya mehatai waroi weru yau ampa. Ampafe metarabera mea weru mene sasariwai tuti menari kariri fianai aino na reantenangfo menaria nanai. Bereri mani, ambori ira mau we ifating mene fio katai pelita doa nai wai weru katai wai ki. <sup>6</sup> Wape iwati fi beng feai kontai na mea, amani menemirireu fio Nikolasi ne inontarai erariati fosa enari fo, kariri yau kontai we enehurireuwa fo.

<sup>7</sup> Mandoni dino wetarang mani, tarao kaiwo Allai Nuaninufoi medurai we jemati kiai nina. Mandoni dino doara mutu dirapa Saminseni pariao wereafo mani, ambori iroa wei we dang aibongno dohoni minohi darang wenumainu ria Allai na Waidani ki.”

### *Kaiwo arerai we jemati na Simirna*

<sup>8</sup> Yesusi medu we yau Yohanesi aha ma, deyo, “Woi we wewaio na jemati na Simirna foi toninai:

Mano *Reantenang Pari* foi tuti *Fui Pari* foi, mano mireha ampa tuti suwi aha ne, ne kaiwo finina; <sup>9</sup> Iwaitawang dadira bitoya mesodaira wa tuti mene pari fi wa ampa. Wape imadurai we mea mau yevo na Sengnei mani inontarai mene fi di mea paria. Tutti iwaitawanai kontai ampa we mesobu kaiwo kahera wai paria, ria inontarai eteyo ea mani inontarai Yahudi tarai saine fosa. Ea mani eteyo etohong kariri Musai ne Hukumifo na mai, wape eteiaya yau Yesusi nehu Kaiwofo, amani Kaiwo kariri todoni ifariri kaiwasafu na imereha wesa fo. Emadu funomai tonanai, weo ea mani, Yahudio etohong kariri Allai ne Kaiwofo na mai saine kaha, mae Saminseni ne inontarai

saine. <sup>10</sup> Dohonao mematai we dadirao katu wori mesodaira fo fe. Weo yeisaharai we mea, Saminseni ambori wedaya inontarai eweaiteta we mea fosa etafu maneua na mea, esoasa to aitamu rorong fo ki. Tuti ambori mesodai dadirafo paria rahida sura. Niari tonanai we meafo we ambori deo wedaya metawai na mene meroasoaf. Wape yevo todoni kontaio meroaso yau terai pampang, pariao masino memarareha kontai ki, tuti ambori yohongno fiembaitafo we mea ki, amani meminohi metarang we fitawafa.

<sup>11</sup> Mandoni dino wetarang mani tarao kaiwo Yesusi Nuaninufi medurai we jemati fi kiai nina. Mandoni dino doara mutu dirapa Saminseni pariao wereafo mani, wenani wiro sodai Marareha Weberu fo kaha.”

### *Kaiwo arerai we jemati na Pergamusi*

<sup>12</sup> “Woi weo wewai na jemati Pergamusi tonanai:

Mano yu sondu reisa tuti reng boru foi ne kaiwo we jematiwai finina; <sup>13</sup> Iparaise we mea. Iwaitawanai we katai meminohi nai wai mani katai Saminseni wemananu nai dine. Tonanai ki, wape mesomi we yaua mutu, tuti mefafora yau kaha. Tuti mewati terai we emung Antipasi, nehu inontarai somi we yau na mai tuti deiriri wonohu wai. Mewatisa emuni na mene bendariwai, kataio Saminseni wemananu nai wai tonanai ki, wape meroasoi mutu, wiro mesu to fui kaha.

<sup>14</sup> Tonanai ki, wape iparaise kahai we fisarawai beiru teaio menari wa, amani inontarai maneiru teai na mea ene tarai kariri Bileami.\* Bileami

---

\* **2:14** Bilangan 22:5, 7, 25:1-3, 31:16; Ulangan 23:4

nini nafafongfa deunauo Baraki we weanggari inontarai Israeli fosa we etaukaha sasarifoi, amani etang fio esomi tutirai we aririwangfosa tuti emaninawa funomai. <sup>15</sup> Mano nanisa kontai ethong kariri Nikolausi tuti ne inontarai erariati fosa ene aunau karira fo. <sup>16</sup> Ampafe metarabera mea weru mene sasariwai. Bireri mani, waroi ahang kahai mae ambori ira mau tuti imunsa na sonduo kiawariai na borohu fenini ki.

<sup>17</sup> Mandoni dino wetarang mani, tarao kaiwo Yesusi Nuaninufi medurai we jemati kiai nina. Mandoni dino doaria mutu, dirapa Saminseni pariao wereafo mani, ambori iroa wei we dang fiang mannao dadiwa fo, amani fiang na Waidani, tuti yohong kamiei biuao isoi wang waworu fo nai foi wei ki. Wang nanai wiyo manei siai deitawana kaha, mae mano sobu kamieifoi meiri andino deitawana ne.”

### *Kaiwo arerai we jemati na Tiatira*

<sup>18</sup> Mayeai Yesusi medu we yau aha deyo, “Woi we wewaio na jemati Tiatira foi toninai:

Seng Allai ne Kaisungno urengfo uransairai ne tarai toyari adia denggararu paria tuti awengfo dedori toyari besi kasoia dedori foi, ne kaiwo we jematiwai finina; <sup>19</sup> Iwaitawang fianai aino menari wa ampa, amani kariri menemiwawuwa, meroaso yau wa, mefata inontarai wa tuti metawang mea na dadira rorong fe wa. Tuti iwaitawanai kontai we na fui ninai fi menari wa nanai fuba pari sewa reantenang meroasoa fo.

<sup>20</sup> Tonanai ki wape iparaise kaha we fisarawafeai menari wa, amani meroa we Isebeli, wiwingno deyo i mani Allai ne nabi demi ma dine

foi. Wiwing nani sofa wawera nehu inontarai erufi we yau nesa bitoya paria tuti deunausa we emaninawa tuti etangno fiang etohonai we aririwangfesara fo. <sup>21</sup> Yohong rahida wei kawuru we daraberahi weru ne sasari maninawa nani faini, manamo merira. <sup>22</sup> Ampefe ikafa kanggunia meninang ambori sodai dadirafo, tuti mandoni saino enari maninawafo riati mani, yohonsa esodai dadirafo pari riati kontai. Tuti efotou enari sasarifo kaha mani, ambori esodai aiboi yohonai tonanai wesa fo ki. <sup>23</sup> Ne inontarai erariati fosa, ahusa we ne arikangfosa, kontai imunsa weruai. Inari tonanai ambori jematiniei kiai ewaitawanai we yauno iwati bau kaiwasa enumikamieifoi tuti enemirorongfoi ne. Tuti ewaitawanai we yohong aiboiwo we mansiari-mansiari kariri sasari enariri foi ki.

<sup>24</sup> Wape mea siai na jemati Tiatira wai, wiro metohong kariri Isebeli ne aunau kerira nani kaha, tuti wiro merurai we mewaitawang Saminseni ne aunau werorong nani kaha. Fianai aino menari tonana fo demoyarai, wiro yohong kaiwoariri siai feai we metohong kaririai ahang kaha. <sup>25</sup> Mae fianai aino mesobuai kawurua fo mani, amani mene meroasoa yau wa, merutawanaia mutu paria sobu rahida yarabera yau nai aha mau foi.

<sup>26-27</sup> Mandoni dino doara mutu dirapa Saminseni pariao wereafo mani, tuti dohong kariri finai aino yawi wea fo paria werea naya fo mani, ambori yohong mambiriuo wei ki, amani mambiriuo Dai na rorafaisi dohonai we yau fo. Ne tarai toyari nabifafong fasa emadu kariri Man-

anu Mampariri foi ne mambiriupo eteyo,  
 'I ambori wemambiri we yu kaiwasa na nunei  
 fosa kiai,  
 tuti disang kanggunsa na ne aitatohi besi foi  
 emangganggung toyari isang kanggung  
 awaing fenanai ki.\*'

<sup>28</sup> Tuti yohongno awaha Ampari wei we fiembaitai kontai ki.

<sup>29</sup> Mandoni dino wetarang mani, tarao kaiwo Yesusi Nuaninufi medurai we jemati kiai nina."

### 3

#### *Kaiwo arerai we jemati na Sardisi*

<sup>1</sup> Mayeai Yesusi medu we yau aha, deyo, "Woi we wewai na jemati Sardisi foi tonina:

Mano yu Allai Nuaninu itu fo tuti yu awaha itu fo na warangfo, ne kaiwo medura finina. Iwaitawang fianai aino menari wa ampa. Kaiwasa eteyo inontarai metarang di mea, amani meroaso yaua mutu. Wape yeitawanai wiro tonanai kaha, mae memararehara, amani mene meroasofo tupa dawohi arorawa, toyari metawera weru meroaso yau fo tuti menemitawanai we metohong kariri Hukumi Musa soi foi ambori feriri mea. <sup>2</sup> Metoabari mea! Merurai tuti mene meroasofo adareti mareha nanai ambori mireha fanai, mae darang aha. Weo iwati fio menari wa wiro mai na Dai Allai arongreafao kaha. <sup>3</sup> Ampefe mearomio kariri fianai aino raminde nanai mesobuai tuti metaramioai nanai, amani kaiwo kariri todoni ifariri mea na meroaso yau fo, wiro na metohong kariri Hukumi Musai soi fo

---

\* **2:26-27** Masmuri 2:8-9

nani kaha. Metohong kariri finanai tuti meroaso yau terai we ifariri mea, tuti metarabera mea weru mene sasario menemitawang Hukumi Musai soi foi we feriri mea fo. Wape metena pampang tuti metoabari mea kaha mani, ira tantuma mau rai, nehu tarai toyari inontarai da we kiamananapi, tuti wiro mewaitawang kariri rahida bodoni dino ira tantuma nai tonanai mau ne kaha.

<sup>4</sup> Tonanai ki, wape inontarai na Sardisi wai manea etanansiau weduarai, amparene tarai toyari ewaitawang wedua ene ansung etatara fo ambori werarika kaha, amani ewaitawang wedua ene taraifoi weru sasarifoi. Inontarai nanisa mani emai, ambori eweriria yau tuti rahida fui wanai esansung ansung bua fo ki. <sup>5</sup> Mandoni dino doara mutu dirapa Saminseni pariao wereafo mani, ambori isansuni na ansung bua fo toyarisa, tuti wiro ifating wonongfo weru Buku soi kariri inontaraio esobu Waidani fosa nai foi kaha. Tuti na Dai Allai tuti ne wewaifosa earomireafo iroa wei we i mani nehu inontarai dine.

<sup>6</sup> Mandoni dino wetarang mani tarao kaiwo Allai Nuaninufi medurai we jemati kiai nina.”

### *Kaiwo arerai we jemati na Filadelfia*

<sup>7</sup> Yesusi medu aha deyo, “Woi we wewai na jemati Filadelfia foi tonina:

Mano mirarebana foi tuti wetarai foi, andino yu Dauti ne aisu mananu foi ne, amani ne mambiri fuba toyari Mananu Dauti na fafongfa. Fiai rahutu bei mani, wiro manei ne mambiriufeari we kifei ahang kaha, tuti kifei mani manei wiro fiai ahang kaha. Amani, rahutufoi tifai weo tara nai to rang waworu feai we yiwangno Hukumi

Musai soi foi. Yahudio etohong kariri Hukum nanisa kontaio wiro ewemambiriu we ehobu rang waworu nani ahang kaha. I mani, ne kaiwo medura finina. <sup>8</sup> Iwaitawang fianai aino menari wa ampa. Iwaitawanai weo mefau kaha. Wape metohong kariri nehu Kaiwone tuti mefafora yau kaha. Ampafe mewati! Ifai rahutu bei tifai we mea ampa, tuti rahutu nani manei wiro we-mambiriu we kifei ahang kaha. Rahutu nani mani ifariri mea na meroaso yau terai fo, wiro na metohong kariri Hukumi Musai soi foi kaha. <sup>9</sup> Inontarai siai mano enemitawang te erurai we etohong kariri Hukumi Musai soi foi we feririsa fosa mani, eteyo ea mani inontarai Yahudi tarai saine tuti eteiaya yau Yesusi. Wape inontarai nanisa epampamu terai, weo wiro eweYahudi na enemirorongfo kaha mae, Saminseni neo inontarai disa. Ea mani, ambori inarisa era mau etisangkapa eawemibukafo na mearomireawa ki, tuti ambori emadu eteyo, ‘Tarai! Mano meroaso te Yesusi wa mea, Sempaisi enewawu mea paria!’ <sup>10</sup> Metohong kariri nehu Kaiwone na mai paria, amani metawang mea ampa na dadira rorong wa, ampare yau kontai ambori yemang wedua mea na rahida nunei sentenang sodai dadira pari fe nai foi ki. Rahida nani mani kaiwasa na nunei kiai sobu fiweanggarisafo we etawai ki. Wape mea mani, yemang wedua mea.

<sup>11</sup> Waroi ahang kahai mae ira mau rai, ampare fianai aino mesobuaia fo, amani mene meroaso yau wa, merutawanaia mutu, ambori fiembaitaio Allai meinenanamai we meara wa, wiro manei kia weru mea fanai. <sup>12</sup> Mandoni dino doara mutu

dirapa Saminseni pariao wereafo mani, wenani ambori minohia pepayai we fitawafa na Waidani. Ne tarai toyario dirio doaria pepayai tuti munu bei, tonanai kontai, yau ambori ikutuaifa we minohia mutu na Allai ne Munufoi na Waidani ki. Tuti ambori isoi Allai wonongfo nai, tuti Allai ne bendari wonongfo nai kontai, amani Yerusalem weworu foi, bendario ambori bia nano Allai na rorafaisi meu foi. Tutti isoi wonohu weworu ne na ne taraifoi kontai ki.

<sup>13</sup> Mandoni dino wetarang mani tarao kaiwo Allai Nuaninufi medurai we jemati kiai nina.”

### *Kaiwo arerai we jemati na Laodikia*

<sup>14</sup> Yesusi medu aha deyo, “Woi weo wewai na jemati Laodikia foi tonina:

Mano wonongno *Antu* foi, i mani mano deiriri kaiwofo na mai tuti na wetarai dine. Tutti fi fubao Allai niariri na nunei kiai ne mani weneung nai. I mani ne kaiwo arerai we jematiwai finina.

<sup>15</sup> Iwaitawang kariri fianai aino menari wa ampa. Amani mene meroasoawa wiro maninggapoi ete danunanang kaha, toyari meraria yau pari kaha, tuti metawing mene meroaso yau wa pari kahai kontai. Ne tonanane karira paria! Denteng mani, merurai paria we meraria yau na mai, ete bireri mani metawing yau beyari finanaia.

<sup>16</sup> Wape wiro menari tonana kaha, mae mene meroasoawa kifikifayai, amani menemiwawera na mene meroasoawa, ete meroaso yau kuteai terai, amafe ikasou mea pariao ambori ikandi mea to boriae weru borohunei ki. <sup>17</sup> Memadu meteyo, ‘Inontarai amene fi di amea, amesobu ra bitoyara, wiro amene pari wefiea kaha.’ Memadu

tonanai wape mewaitawana kahai weo na mene meroasoawa mani, mene obu fiea kahaifa ne ne? Mekaharia mebeng kahai, meuremiwa fafa, tuti menayai arora. <sup>18</sup> Ampafe yeunau mea mau we todoni mani meworio fi mai fo ria yau, amani emasio mai sewa fo we mene ra, ambori na Sempaisi arongreafo mani mene ra bitoya, tuti mewori ansung bua fo we mesansung nai ambori menayai arora tuti memamaya ahang kaha. Kontai rawangno ufi tauremine naya fo ambori metufi meuremiwa naya mani mewati aha.

<sup>19</sup> Mandoni dino enehuwawuti fo mani, niari sarawa mani isuari tuti yohong aiboifo wei we yeunauwi nai. Ampafe isua mea, yohong aiboifo we mea tonina ne mani, merurai paria tuti metarabera mea weru mene sasariwai ambori mene meroaso yau wa wiro kifakifayai ahang fanai. <sup>20</sup> Mewati! Ira mau yoa na mene rahutu borong wa mae yutanai. Mandoni dino taraoai tuti fiai rahutufoi we yau mani, ambori ira wei afui tuti iminohi yampi riati tuti dampi ria yau kontai.

<sup>21</sup> Mandoni dino doaria mutu dirapa Saminseni pariao wereafo mani, ambori iroa wei we minohi ria yau na nehu kadera mananu nei. Kariri yau we yoara mutu yirapa Saminseni fo, ampafe iminohi ria Dai Allai na ne kadera mananu fe nina.

<sup>22</sup> Mandoni dino wetarang mani, tarao kaiwo Yesusi Nuaninufi medurai we jematifi kiai nina.”

## 4

*Yohanesi detifi kariri Allai ne mananufo*

<sup>1</sup> Mayeai iwati fieai aha, amani iwati rahutu bei na rorafaisi tifai. Ainanaya tarahuo mano anta medu we yau na rawafui fiebai toyario songgerifo, medu we yau nariai aha deyo “Bautai toninai meai, we yeinawi kariri fianai aino ambori kawariai aha fo we wau.” <sup>2</sup> Na tatofang nanai kontaio, Allai Nuaninufoi sensoni yau. Ainanaya iwati kadera mananu bei na Waidani tuti manei minohi nai. <sup>3</sup> Wenani keiwewa toyari kamieio keiwewa ne harga dedai, amani kamieio memarampoti esahui we intan, tuti kamieio berika esahui we sardisi fenanai. Tuti aewi bei doa woruwi na katai minohi nai foi. Aewi nani ne tarai kariri kamieio ne harga dedai bei, amani kamieio keiwewa, esahui we zamrud. <sup>4</sup> Na katai nani kontai iwati kadera mananu fo piareia boa tuang wariri, tuti mano eminohi naya fosa mani, mano ewewafoniai ewepiareia mana fosa. Ansung etatara fo bua karofari tuti etata sapewi mananu fo na enumifo, sapewi nanai enari na emasi kiai. <sup>5</sup> Tuti na kadera mananu foi nani iwati kaiwewa kewariai nai tuti kadidu dotu tuti nubuayai nai. Mae na arongfo, oborio itu doa danggararu nayai. Obori nanai deinawi karirio Allai Nuaninu itu fo. <sup>6</sup> Tuti iwati rawanang bei mani, ne tarai toyario kasinai wiatai na arongreafao, memarampoti paria.

Mae iwati fidarang mana etoari na katai kadera mananu foi warabuka boa fo. Euremifo bitoya paria, amani bitoya na earomifo tuti bitoya na ehurumifo. <sup>7</sup> Fidarang mano reantenang foi ne tarai toyario singa, mano mandu foi ne tarai toyario sapi mang manei, mano mantoru foi mani ureng toyario inontarai, tuti mano

mana foi ne tarai toyario koroweio yera warapemafoi we sifo. <sup>8</sup> Tuti ewaramipemafo aiwonang, na ene taraifoi sentenang weureng, tuti na ewaramipema arowawahi fo kontai weureng. Diru rahida erohi pampang efiai Allai. Erohi eteyo,

“Seng Allai wau, murarebanai, murarebanai,  
murarebanai,  
Mano Wemananu Dedai Mantaung di wau,  
Mano nayai kawuru na reantenang pari foa foi  
di wau,  
Mano nayai pariao sobu rahida bonini,  
tuti Mano nayai pampang we fitawafa di wau.”

<sup>9</sup> Mano fidarang mana nanisa erohi rarungfoi we efiai Allai mano minohi na ne kadera mananu foi nani, amani mano minohi wenumainufo. Etaparandini, esomi wei, tuti etohong mahikai wei. Erohi efiai tonanafo, <sup>10</sup> mano ewewafoniai fosa, amani mano ewepiareia mana fosa, etawai aweu etisangkapa eawemibukafo na Mano Darang We-fitawafa foi arongreafo, esomi wei tuti efating ene sapewi mananu fo etohonai watai na arongreafo tuti emadu eteyo,

<sup>11</sup> “Dai Allai amene Sengne wau,  
Meiri wauno mosi we amefiai waune.  
Meiri wauno weMananunei.  
Wauno ametaparanding wau,  
Amesomi we wau tuti ametohong mahikai we  
waune.  
Weo wauno nari fi fuba nini kiai ne.  
Tuti nariri kariri nemu bawia wa ne.”

## 5

*Buku reraungno kafaria mitu foi tuti Domba Antungfoi*

<sup>1</sup> Mayeai iwati mano minohi na ne kadera mananu foi yuo buku reraungno kafaria bei na warang domoya foi. Buku reraungfoi dowani donini sefang na kaiwoariri, tuti taha weduaria mitu na segel kesi itu (7). <sup>2</sup> Ainanaya iwati wewai wemambiriu manei medu na rawafui fiabai deyo, “Mandoni dino mesi we fioabuo segel kesi itu fo tuti fiorera buku reraungfoi ne?” <sup>3</sup> Wape na rorafaisi ete na nunei, ete na kofa rorong wau kontaio, manei wiro mesi we fiai kaha tuti deto kaiwo nayai na rorongfoi kaha. <sup>4</sup> Tarahuo kaiwofo nanai isaia yeidu, weo wiro obu manei mesi we fiorera bukufoi tuti deti rorongfoi kaha fefe. <sup>5</sup> Ainanaya manei na mano ewewafoniai fosa medu we yau deyo, “Wai fanai! Boti! Inontarai manei, wonong fino *Singa Na Yehudai*, ahui we *Riria Na Dauti* kontai, andino kiraikobu Saminseni. Meiri andino mesi we fiosabu segel kesi itufo tuti fiorera buku reraungfoi ne.”

<sup>6</sup> Mayeai iwati Domba Antung manei doa rahanai na kadera mananu foi, tuti fidarang mana fosa, tuti mano ewewafoniai fosa. Domba Antung foi iwatiao na ne taraifo pesai fari bitoya toyari emuni kawurua fenana. Nungkaradoi itu tuti ureng itu kontai. Nungkaradoi itu fo deinawi ne mambiriu fuba fo, tuti ureng itu fo deinawi Allai Nuaninu ituo denatuai we nunei sentenang ne. <sup>7</sup> Ainanaya Domba Antung foi saha afong yuo buku reraung kafaria mitu foi ria mano minohi na

kadera mananu foi warang domoya foi. <sup>8</sup> Na kutu warawa yuo buku reraungfoi nana fo, fidarang mana fosa tuti mano ewewafoniai piareia mana fosa etawai aweu etisangkapa eawemibukafo na arongreaflo. Eru kecapifo tuti rewangguainofio enari na emasi fo, rewangguai nofi nanai esoni finunsai mamporio deinawi Allai ne inontarai emararebana fosa ene nadifo.

<sup>9</sup> Tuti erohi rarung weworu rowei dotu tono:  
“Wau mosi we ka buku reraung kafaria mitu nani ne,

tuti fosabu segeli taha weduari nai foi ne.

Weo emung waua mureha ampa,  
tuti na nemu rika tiwowu nani,  
bai kutu inontarai fuba nunei kiai,  
we Allai ampa,  
amani inontarai na riria bodoni kontai,  
na kaiwo bodoni kontai,  
tuti na nu bodoni kontai.

<sup>10</sup> Ruai inontarai nanisa kiai we nemu inontarai  
we eminohi na nemu Mananuwa,  
tuti ambori we eweimami,  
we erufi we tane Seng Allai,  
tuti eru nunei ki.”

<sup>11</sup> Mayeai iwati tuti itarahuo wewai katui ahang kaha, bitoya paria ne fiaufo tarahio 1.000 we 1.000, tuti 10.000 we 10.000, wiro ato afonso ne fiaufo kaha, etoa wari kadera mananu foi, tuti fidarang mana fosa, tuti mano ewewafoniai fosa. <sup>12</sup> Erohi na erawamifui fiabai eteyo,

“Domba Antungno emung waua wa wau mosi,  
Mosi we Allai yu wau we weMananu,  
Mosi we wobu ra we nemu,  
Mosi we wobu Allai ne awaifo,

Mosi we Allai dohong wau wemambiriu,  
 Mosi we amesomi we wau,  
 Mosi we ametaparanding wau,  
 Tuti mosi we amefiai wau.”

<sup>13</sup> Ainanaya tarahuoinontarai fuba nini kiai, tuti andowa fuba nunei kiai, amani mano na rorafaisisa, na nuneisa, tuti na kofa rorong wausa, erohi efiai eteyo, “Mano munohi na nemu kadera mananu wai, tuti Domba Antung wa wau, Muruino amefiai muru, Muruino amesomi we muru, Muruino ametaparanding muru, tuti muruino muwemananu we fitawafa ne.”  
<sup>14</sup> Fidarang mana fosa eroatuba ene rarungfoi eteyo, “Antu!” Tuti mano ewewafonai fosa eti-sangkapa eawemibukafo esomi we suru.

## 6

### *Domba Antung foi fiosabuo segeli wonang fafong fo tuti fio kawariai naya fo*

<sup>1</sup> Mayeai iwati Domba Antung foi fiosabuo segeli itu fo bo reantenang foi. Ainanaya iwati fidarang mana fosa, tuti manei nasa sahu na rawafui fiabai toyari kadidu fenanai deyo, “Ro ma!” <sup>2</sup> Ampafe iwatia mani, iwati kuda biua manei kiawariai ma, tuti inontarai manei dautai nai. Inontaraifoi mani yuo afai aburuei na warangfo, tuti manei dohong sapewi mananu bei wei. Inontarai nani da weinontarai wemambiriuwe miung woru ne aitetafosa kiai.

<sup>3</sup> Mayeai iwatiao Domba Antung foi fiosabu segeli bo boru foi aha tuti tarahuoinontarai fidarang

mana fosa, manei siai medu aha deyo, “Ro ma!”  
<sup>4</sup> Ainanaya iwati kuda manei aha kiawariai aha ma. Kuda nani mani berika toyari abo. Mano dautai nai mani manei dohong sondu fiabai bei wei tuti dohong mambiriу wei we fiating ne maifo weru nunei, ampafe wedaya inontarai nunesa eminohi na mai ahang kaha mae emamuna tuti emung waweresa.

<sup>5</sup> Mayeai Domba Antung foi fiosabu segeli bo botoru foi aha. Tuti tarahuо fidarang mana fosa, manei siai aha medu deyo, “Ro ma!” Ampafe iwati aha mani, iwati kuda niuemetang manei. Mano dautai nai foi yu fititua maraba nai bei na warangfo. <sup>6</sup> Tarahuо rawafui bei medu rahanaи na fidarang mana fosa, amani medu kariri aiboi kahari foi, deyo, “Pa denteng literi bei mani ne harga dedai paria, mai kariri manei yufi mani ne fiebaitai rahida bei fo, tuti pa denteng turura kaha foi kontaio literi botoru mani ne hargofo tonanai kontai. Wape ai saituni bongfoi tuti angguri bongfoi mani meiri fanai.”

<sup>7</sup> Mayeai Domba Antung foi fiosabu segeli bo boa foi aha. Tuti tarahuо fidarang mana fosa mano sea foi medu deyo, “Ro ma!” <sup>8</sup> Ainanaya iwati kuda manei aha wape ne tarai fidadiru toyari mirehara. Mano dautai nai foi wonong fino *Marareha*, tuti manei siai, wonong fino *Aitamu Marareha Rorong* fo, da riati na kurufuifo. Usobu mambiriу we urato kutu kaiwasa na nunei kiai we rabuang boa, tuti rabuang bei nasa mani ( $\frac{1}{4}$ ), umunsa weruai. Kaiwasa nanisa umunsa na mamuna, na kahari tuti fimaninang fimung, tuti na andowa memuna foi.

<sup>9</sup> Mayeai aha mani Domba Antung foi fiosabu nario segeli bo ring foi aha. Ainanaya iwati inontarai emarareha fosa enumianinufo, enayai na mesba arowawahifo, amani mesba ne tarai kariri mesbaao fafongfa enunung korbani we Allai nai foi. Ea mani mano kaiwasa emunsa weo ewuwu Seng Allai ne Kaiwo kariri Yesusi fo, tuti emadu eteyo Yesusi ene Seng dine, pariao wedaya emunsa tonana. <sup>10</sup> Esahu na erawamifui fiabai eteyo, “Sengno weMananu, murarebanai tuti tarai ne waune, kidoni wori kutu kaiwo kariri inontarai nunei fosa tuti inontaraio raminde emung amea fosa, tuti bohong aiboifo wesa ki?” <sup>11</sup> Ainanaya manei dohong ansung bua fo mai sa tuti medu wesa deyo, “Metawang mea metamang kuteai, pariao mene doroi tuti mene maniworiri fosa era ruhiai ma memai akawuru wo. Mene doroi tuti mene maniwowiri nanisa Allai dirisa we ambori kaiwasa emunsara emarareha toyari raminde meara fo.”

<sup>12</sup> Mayeai iwati Domba Antung foi fiosabu nari segeli bo wonang foi aha. Fiosabui tonana fo, mundiei fiabai bei fiorirouwai na mambiriu, tuti wofaisi niumentang toyari ke fenanai, embaifoi kontai berikahofi toyari rika. <sup>13</sup> Awahafaisi kontai tiafating tuti tiraru to nunei aweu toyari deduka si kahutu aibong kendi fenanai. <sup>14</sup> Tuti rorafaisi kontai niai toyari riraung mintantunung wape wanangfoi siparia niai. Tuti uai tuti nufo kontaio tawera weru katai doa naya fo.

<sup>15</sup> Ainanaya mananu fuba nunei kiai, inontarai baba fosa, mano ewenunggamiei we afai mamuna fosa, mano ene fi fosa, mano ewemambiriu

fosa, kontai womingfosa tuti inontarai siai wei fosa kiai, ewawua etadiwa na katai we winsaburungfo tuti manapahangfo na uai rei. <sup>16</sup> Mae esahu we uaifo tuti manapahangfo eteyo, “Tiru meu biritawang amea, bodiwa amea weru mano minohi na kadera mananu foi urengfo tuti weru Domba Antung foi ne kasoufo. <sup>17</sup> Weo rahida fuba Allai tuti Domba Antung foi urainawi une kasou fiabai fo we kaiwasa nunei foi andinini, tuti mandoni kontaio wemambiriw we sodai ne tonanafo kaha.”

## 7

*Inontarai Israelio ewe-144.000 esobu Allai ne fiainawiaifoi na ene tarafrai*

<sup>1</sup> Mayeai iwati wewai mana, etoari na nunei rea boa ne, mae erutawang wanang urengfo kai ambori wiyo siaya fanai, na rawanangrausi, ete na reirei tuti na ai rorong fo fanai. <sup>2</sup> Ainanaya iwati wewai siai manei kiawariai na do wanang murang foi ma. Yuo Allai mano darang wefitawafa foi ne capifoi na warangfo, tuti sahu na rawafui fiabai we wewai manao esobu mambiriw we emei nunei na wanangfo nanisa. <sup>3</sup> Sahu wesa deyo, “Dohonao metawing wanangfo we mei rawanangrausi ete reireisi tuti ai rorong foi fanai, pariao amewecapi tane Seng Allai ne womingfosa ere-womifo na ne capinei akawuru wo.”

<sup>4</sup> Ainanaya tarahuoi we kaiwasa wecapisa nanisa mani ewe-144.000, amani inontaraio dirisa na inontarai Israeli rabuangno ewesuraya boru fosa ene ririafoi saine.

<sup>5</sup> Na riria Israelifo rabuang bei mani ewecapio ewe-12.000, amani:

Na Yehudai ne ririafoi ewe-12.000

Rubeni ne ririafoi ewe-12.000

Gati ne ririafoi ewe-12.000

<sup>6</sup> Aseri ne ririafoi ewe-12.000

Naftali ne ririafoi ewe-12.000

Menaseri ne ririafoi ewe-12.000

<sup>7</sup> Simeoni ne ririafoi ewe-12.000

Lewi ne ririafoi ewe-12.000

Isakhari ne ririafoi ewe-12.000

<sup>8</sup> Sebuluni ne ririafoi ewe-12.000

Yusupi ne ririafoi ewe-12.000

tuti Benyamini ne ririafoi kontai ewe-12.000.

*Kaiwasa bitoyao ato afonsoi kaha foi etoari na  
Allai tuti Domba Antung foi uaromireafo*

<sup>9</sup> Mayeai iwati aha mani iwati kaiwasa katui ahang kaha, ato afonsoi kaha. Kaiwasa nanaisa mani inontarai fuba nunei kiai saine, amani inontarai na riria bodoni kontai, na kaiwo bodoni kontai, tuti na nu bodoni kontai. Esansunsa na ansung bua, etoari na kadera mananu foi refongfo tuti na Domba Antung foi arongreafo, tuti eru ai baya na ewaramifo. <sup>10</sup> Na erawamifui fiabai etaparanding Allai eteyo,

“Amefiai wau,

amene Seng Allai,

mano munohi na nemu kadera mananu wai!

Tuti amefiai Domba Antung wa wau!

Weo mumeiri muruino mufariri inontaraine amea ne!”

<sup>11</sup> Wewaifoi kiai etoa wari kadera mananu foi, tuti fidarang mana fosa, tuti mano ewewafoniai ewepiareia mana fosa, etawai aweu etisangkapa

eawemibukafo na kadera mananu refongfo tuti esomi we Allai eteyo,

<sup>12</sup> “Antu!

Allai, amene Sengne wau,  
meiri wauno amefiai waune  
tuti ametaparanding waune.

Wauno wowai ne,  
ametohong mahikai we wau,  
tuti amesomi we wau.

Wauno weMananune tuti wemambiriu we fitawafa ne.

Antu!”

<sup>13</sup> Ainanaya mano ewewafoniai fosa manei dutang yau deyo, “Mano esansung ansung bua fo wanisa mani, mandoni saine, tuti era na doni ma?” <sup>14</sup> Ampafe iroa wei yeyo, “Daie! Iserawerahai, wau boitawana ne.” Ainanaya medu we yau aha ma deyo, “Kaiwasa fuba nanisa mani inontaraio esodai karirafo paria na dadira fiabai rorong nanai kiai na nuwausi tuti era na dadira rorong nanai ma. Ea mani eruai ene ansungfo na Domba Antung foi ne rikafoi tuti enaria bua karo-faria fo saine. <sup>15</sup> Nanai aino wedaya Allai yoa wesa we etoari na arongreafe nina, tuti diru rahida ewewoming wei na ne Munu rorong fo. Tuti Allai, mano minohi na kadera mananu foi, ambori demang weduasa ki. <sup>16</sup> Wiro enumiruainso ewawisi na weai ahang kaha, tuti earomitataha na weai ahang kaha, wiro enumiruainso wofoi piasara esasora ahang kaha. <sup>17</sup> Weo Domba Antungno doa rahanai na kadera mananu foi, andino ne tarai we mantahung we dehunsa ne. I ambori kiasa we

etunung mereha urengno dohong kaiwasa eminohi etarang we fitawafa foi ki, tuti Allai ambori dufi euremikurufo ki.”

## 8

### *Segeli bo itu foi, Domba Antung foi fiosabui*

<sup>1</sup> Mayeai Domba Antung foi fiosabu segeli bo itu foi nanai, rorafaisi wewui beyari paria araha ureng aburung fea.

<sup>2</sup> Ainanaya iwati wewai ituo etoari na Allai arongreafao, tuti manei dohongno songgeri itu wesa.

<sup>3</sup> Mayeai iwatio wewai siai manei kiao nofi nunung finunsai mampori naio nariri na emasi foi, da wa doari na mesba arongfo. Tuti manei dohong finunsai mampori bitoya weia we niunung ria inontarai eroaso fosa ene nadifo na mesbafoi, na kadera mananu foi refongfo. <sup>4</sup> Ampafe irraungno finiunsai mamporio wewaifoi niunumi foi, dautai ria mano eroaso Yesusi fosa ene nadifo we Allai ayai, na nofio niunung finiunsai mamporio yuti na warangfoi. <sup>5</sup> Mayeai wewaifoi da wa kia adiafo na mesbafoi ma, soniae to nofi niunung finunsai mamporio yuti na warangfoi, tuti kifa kangguni to nuwausi aweu. Ampafe kadidufoi sarabau kahofa wau tuti kaiwewafoi keiwewari bitoya paria, tuti mundiei fiabitureha bei fiorirouwai na mambiriu.

### *Wewaifosa ebui songgeri wonang foi fafong*

<sup>6</sup> Finanaia kaifo, wewai itufo emainenang we ebui songgeri ituo eru fo.

<sup>7</sup> Ainanaya wewai mano reantenang foi biuio songgeri bo reantenang foi, mayeai na tantuma

metang kamiei foi miung, metang nani miung-tuti adiafoi tuti rikafoi to nuwausi aweu, wedaya nuo ato kutuwi we betoru foi, adia kaso weai (%). Tonanai kontai we ai tifu foi, amani kutuwi we betoru foi adia kaso do weai tonanai kontai, tuti ninoi kehe foi, adia kasoi kiai.

<sup>8</sup> Mayeai wewai mano mandu foi biui nari songgeri bo boru foi aha, ainanaya iwati manei so fi ne tarai toyari uai fiabai denggararu toyari adia bei to rawanangfoi aweu. Wedaya rawanangfoi ato kutuwi we betoru foi kontai dowej (%) werikara sentenang. <sup>9</sup> Tuti fi niai nai foi kontai ato kutuwi we betoru foi, dowej (%) mirehara kiai; tonanai kontai we kaparifoi kiai, ato kutuwi we betoru kontai, dowej (%) deisui ete kerira kiai.

<sup>10</sup> Mayeai wewai mano mantoru foi biui ne songgeri yuti foi aha, ainanaya awaha fuba bei denggararu toyari antironi fenanai, sawai na ro-rafaisi to wayafo aweu, wedaya wayafo tuti mereka ureng fo na nunei ato kutuwai we betoru, dowej (%) pirandima kiai. <sup>11</sup> Awaha nani wonong fino *Pirandimai*. Ampafe dohong wayafo tuti mereka ureng fo doweai tonanai parandima wedaya inontarai bitoya emarareha weo etunung merekafo fefe.

<sup>12</sup> Mayeai wewai mano mana foi biui ne songgerifoi aha, ainanaya iwati fieai bioi kobu wofoi ampefe bauri we betoru mani dowej (%) kerirawao mamantiti. Tonanai we embaifoi tuti awahafo kontai. Finanai kiai wedaya rahidafoi atori we betoru mani, dowej (%) mamantiti, tuti dirufo tonanai kontai, atori we betoru mani, dowej (%) awahafoi tuti embaifoi wiwo danggararu kaha.

<sup>13</sup> Mayeai iwati aha mani, iwati romu korowei manei sifo kefang aweu kahai, mae sahu na rawafui fiabai deyo, “Karirao! Karira! Karira paria we inontarai nuwai mea, weo na rabuang bo wewai mantoru fui fo sitoru itobui itone songgeri botoru fo aha mani, mesodai karirafo paria na fi karira botoru fo ki.”

## 9

<sup>1</sup> Mayeai wewai mano ring foi biui ne songgerifoi aha, tuti iwati awaha bei sawai na rorafaisi to nuwausi aweu. Manei dohongno aisufoi we awahafoi, ambori fiai Kamirei Berorong foi\* nai. <sup>2</sup> Ainanaya fiai Kamirei Berorong foi tuti riraungfoi kiawariai na kamirei rorong fo ayai. Riraungfoi mintantunung toyari kafafe ni-umetang fenanai, awa tebung wedua wofoia sambewarai nariai ahang kaha tuti rorafaisi kontai memantiti beyari. <sup>3</sup> Tuti mansonggeri katui ahang kahai kiawariai na riraung rorong foi aweu sinsung nunei. Mansonggeri nanisa esobu mambiri we etisang mani damirai toyari amafiahi. <sup>4</sup> Mano demisa foi, deretawansa weo wiro emei aifoi, ninoifoi ete fitantanang siai wei foi fanai. Mae etisang te inontaraio wiro esobu Allai ne capifoi na erewomifo kaha fosa terai. <sup>5</sup> Wape wiro esobu mambiri we ewedayasa emarareha kahai, mae ene memufoi wedayasa etamirai beng kaha paria embai ring. Ene memuo wedayasa etamirafo ne tarai toyario amafiahi we disang

---

\* **9:1** Amani kamireio etamu Saminseni tuti neo raifosa nai, pariao esobu aiboi na rahida Sengnei kiutu kaiwo nai foi.

manei mani damira fenanai. <sup>6</sup> Na rabuang bonani kaiwasa nanisa enemirorong dohong paria we emarareha terai, wape mararehafoi toyari niayai waroi werusa.

<sup>7</sup> Mansonggerifosa ene tarai toyario kudao meineng we memuna. Na enumifo etata fi ne tarai toyari sapewi mananu, nariri na emasi, mae euremi toyari inontarai. <sup>8</sup> Enumirandaungfo dawariroi toyari wiwing enumirandaung, tuti ederemi toyari singa dereng. <sup>9</sup> Earomifo tabung weduarai na fi ne tarai toyario ansung besi. Tutu esifo mani ewaramipemafo nubuayai toyari kuda bitoya paria emitu rifu oto mamuna fo to mamuna rorong ne nubuayafo nanai. <sup>10</sup> Eamamindaung kariri amafiahia tuti weababo tonanai. Ene mambiriufo nayai na eamamindaung nanai, we etisang inontaraifosa nayai, tuti wedayasa etamirai paria we embairing. <sup>11</sup> Ene mananuo wenunggamiei wesa foi mani, wewaio wenunggamiei we Kamirei Berorong foi dine. Wonongfo na kaiwo Iberani mani esahui we Abadoni, mae na kaiwo Yunani mani esahui we Apolioni. (Nana mani *Mano Niari Fi Karira.*)

<sup>12</sup> Fi kia karira fo ne reantenangfe tawera ampa. Wape beruo ambori da aha ma ki.

<sup>13</sup> Mayeai wewai mano wonang foi biui ne songgeri yuti foi aha. Ainanaya tarahu rawafui bei kiarai na mesba emasio wiatai na Allai arongreafdoi, nungkaradoi boa fo. <sup>14</sup> Rawafuifoi medu we wewai mano wonang foi deyo, “Bisuo wewai manao eworasa etoari na waya fiabai Efrati foi.” <sup>15</sup> Ampafe da wa disuo wewai mana fo sara, weo

waroi ampa etamang we ne diru neungfo mai, amani emainenansa terai we ene defuinafo, embaifo, rahida tuti araha ureng mai we era. Tuti era weo emungno inontarai na nuneisa, ato kutusa we betorua mani, emung rabuang bei (%).  
**16** Tarahu rawafui bei deikarirai we yau deyo, afa mamunao etautai na kudafo era ria wewai mana fosa nanisa mani ewe-200 juta.

**17** Tuti na fiainawiai iwatioa fo mani, iwati afa mamuna fosa tuti kudao etautai nai fo nanisa mani, afaifosa esansung ansungno besia ehai. Ansung besi etatara fo mani arongfo barikahof i toyari adia, kahe rawanderi, tuti bamining toyari kamiei belerang. Mae kudafosa mani, enumikamieifo toyari singa. Adia, riraung, tuti belerang kawariai na eboromifo ariei.  
**18** Fi betoru kawariai na kuda eboromifo ariei nanai ne tarai we fimung, wedaya inontarainesa kiai, ato kutusa webetorua mani, rabuang bei (%) na sa mirarehara kiai.  
**19** Kudafosa ene mambiri wedaya inontarai emarareha nai nanai, nayai na eboromifo tuti na eamamindaungfo. Weo eamamindaungfo wenungkamiei toyari tawai nungkamei, tuti na eamamindaung nanai enari kanggani tuti emung inontarai nai.

**20** Wape kaiwasa bitoya foi, amani ne seo emarareha na fimung nani kaha fosa, wiro ematai we etaraberasa weru ene sasari enariri foi kaha. Wiro efotou esomi we arowuifoi kahai, aririwangno enariri na emasi, peraki, tembaga, kamiei tuti ai foi kaha. Fi esomi weai tonana fo wiro weureng we deti kahai, wetarang we tarao kaiwo kahai, tuti weaweng we da kahai.  
**21** Ea kontai wiro etawing fi kerira enariri foi

kaha, toyari emung inontarai fo, eha rawang fo, emaninawa funoma fo, tuti ehamananapifo kaha.

## 10

### *Wewai tuti buku reraungno ketui foi*

<sup>1</sup> Mayeai iwati wewai siai manei aha. Wewai nani wemambiriu paria, biari na rorafaisi meu. Ne tarai kariri sensuni na kafafe bei, tuti aewi bei doa na nungfoi. Urengfo sambewarai toyari wo sambewarai mae awengfo ne tarai toyari aisiyang fiabai denggararu fenanai. <sup>2</sup> Na warangfo yu buku ketuio rerawi kawurua bei. Biari meu, aweng bo domoya foi doa sau rawanangrausi mae aweng dowej foi doa sau reitahafoi. <sup>3</sup> Sahu na rawafui fiabai paria, ne fiabaifoi toyari singa manei bibe, tuti kadidu itu dotu tuba rawafuifoi aha, toyari eroao ne kaiwofo. <sup>4</sup> Kadidu itu fo dotu kai nanai yeo isoi kaiwo tarahuoi nanai, manamo tarahuo rawafui bei medu we yau na rorafaisi deyo, “Wiro woi kaiwo taramuoai na kadidu itu fo nana fanai, mae taramuoai terai tuti nemuboruoifa ra.”

<sup>5</sup> Ainanaya wewai anta iwatiodi nani, amani mano doa na rawanangrausi tuti na reitahafoi, yuai warang domoya foi to rorafaisi ayai we fefora. <sup>6</sup> Tuti fefora na Allai wonongfo, mano darang wefitawafa foi, andino niari rorafaisi, nunei, rawanangrausi tuti fi kiai niayai nai foi. Fefora deyo, “Fianai aino Sengnei kiutuai we niari fo, finanai wiro fioukirai ahang kaha. <sup>7</sup> Wape na rahidao wewai mano itu foi biui songgeri bo itu foi mani, fianai aino Allai kiutuai kawurua we niari fo, pariao ninai dediwara nendai fo, dohong

kaririai ki, kariri Kaiwo Mahikai medurai we ne womingfesara fo, amani ne nabifosa.”

<sup>8</sup> Mayeai rawafui anta tarahuoi medu we yau na rorafaisi nani, medu aha deyo, “Roa, ka buku reraungno tirera kawurua foi ria wewaio doa sau rawanangrausi tuti reife nani na warangfo ma.”

<sup>9</sup> Ampefe ira we wewaifoia yutani we dohong buku reraungfoi we yau ma. Ampafe medu we yau deyo, “Karia tuti bani. Na boromuwa numuruainso memisi toyari aniya ne maing, wape toni afui wori dohongno enemuwai memboni ki.” <sup>10</sup> Ainanaya ika buku reraungfoi riati na warangfo ma tuti yani kariri deyoafo. Yania mani, na borohune nuhuruainso memisi kariri aniya ne maing, wape itoni afui mani wedaya enehufuisi memboni paria. <sup>11</sup> Ampafe manei medu we yau aha deyo, “Wuwuo Allai ne kaiwo dohonai we wau ne aha, kariri fio Allai deyo ambori niari nao nunei fo, amani fio niari we kaiwasa na riria bitoya, inontarai na kaiwo bitoya, inontarai na nu bitoya, tuti we mananu bitoya kontai.”

## 11

### *Kaiwo kariri Allai ne nabi mandu demi suru fosuru*

<sup>1</sup> Mayeai manei dohongno ai rea titua fi nai bei we yau, tuti Allai medu deyo, “Ka fititua nai nani we roa titua nehu Munufoi na Yerusalem nai fosa maneiru. <sup>2</sup> Wape munu refong boriei foi mani tituati fanai, weo katai nani mani yohoni terai we inontaraio etaroanso yau kaha fosa. Inontarai nanisa ambori eru bendari mirarebanai

Yerusalemia embai piarua boru tuti emei kanggani ki. <sup>3</sup> Tuti ambori yohong mambiriw we nehu inontarai mandu we umadu nehu kaiwo yohonai we suru ne rahida 1260 ki, ete embai piarua boru. Inontarai nani suru usansung ansung toyari ansung karungfo, amani ansungnofafongfa nabi Israeli fossa esansuna fo.”

<sup>4</sup> Allai ne inontarai nani ansuruino, ahu suru we ai saituni roworu fo tuti pelita aweng boruo\* uroa na Allai, mano weSeng we nunei sentenang, arongreafu suruine. <sup>5</sup> Masino manea eteo enari karirafeai we suru mani, ambori adia kiawariai na uboromifo ariei we kasu mano enari kanggani suru nanisa ki. Ampefe une aiteta enari kanggani suru nanisa, adiafoi kasosa emarareha tonanai. <sup>6</sup> Inontarai nani suru Allai dohong mambiriw we suru we ureiwedua metangfoi, ambori ming kahai paria rahida umadu kariri Allai ne kaiwofo werea naya fo. Usobu mambiriw kontai we unari merehafoia werika tuti unari kanggani nunei na fiumungfoi kiai kontai. Une mambiriw we unari finanai na rahida bodoni kontai ureo unari tonanafo.

<sup>7</sup> Umadu kariri Allai ne kaiwofoa kaia mani, andowa memuna manei, amani andowa memuna sewa foi kiawariai na Kamirei Berorong foi meai, tuti na mamuna rorong fo dapa suru tuti ming surua umararehara. <sup>8</sup> Tutti une taraifoi wiatai funomai na rang fiabai foi na bendari fuba foi. Bendari fuba nani kataio raminde epahu Sengneia mireha sawai nai foi dine. Bendari nani mani wonong tatawa fino Sodomi tuti Mesiri, weo Sodomi tuti

---

\* **11:4** Zakariai 4:1-3, 11-14

Mesiri kontaio unemirireu Sengfoi. <sup>9</sup> Uwatai na nanai rahida botoru aburung feai mae, kaiwasa na nunei sentenang, amani inontarai na riria bodoni kontai, na kaiwo bodoni kontai, tuti na nu bodoni konta fosa, era ma we esai suru. Tuti etei-wedua mandoni kontai we wiro eha surua esarai suru fanai. <sup>10</sup> Kaiwasa na nunei sentenang en-emirireu suru ampefe efaraise we umararehafo, etohong muniara tuti etohong fi wawerahai wesa we etohonsua une mararehafo. Weo nabi nani suru unari kanggani inontarai nunesa paria fefe.

<sup>11</sup> Wape rahida botoru aburung feai aha mani Allai dohong ansengfoi we suru aha, ampare usuwi na marareha rorong foi aha ma tuti kaiwasafai ewati suru we uroari na earomireafo nanisa emataia etaperemi kiota eboromifo. <sup>12</sup> Mayeai Allai ne nabio duwi suru nani suru, utarami rawafui bei sahu na mambiriu na rorafaisi meu deyo, “Murautai meai.” Ainanaya kafafe bei sea ma soru surua, kia suru urautai to rorafaisi na une aitetafosa euremireafo.

<sup>13</sup> Na kutu nanai kontaio, mundiai fiabai turehi bei fio, wedaya bendari fuba foi, ato kutui wesura mani, ne katai besura nanai ( $\gamma 10$ ) mangganggung, tuti inontarai ewe-7.000 emarareha. Inontarai siai fosa, mano emarareha na mundiaifoi kaha fosa, ematai ebeng kaha wedaya etaparanding Allai na rorafaisi.

<sup>14</sup> Fi kia karirafo ne beru fe tawera ampa. Mae mewati ne betorufe anseung kahai mae kawariai aha ki.

*Songgeri bo itu foi tuti rarungno mano ewefonial fosa erohi foi*

<sup>15</sup> Mayeai wewai mano itu foi biui songgeri bo itu foi aha, ainanaya tarahu rawafui bitoya na rorafaisi erohi na erawamifui fiabai eteyo, “Ninaia mani, nunei kiai, tuti nu bodoni kontai na nunei sentenang, nayai na tane Sengnei tuti ne Mananu Mampariri foi, uwarami rorong fo ampa. Tuti Sengnei ambori wemananu we yu nunei we fitawafa.”

<sup>16</sup> Tuti mano ewewafoniaio ewepiareia mana eminohi na kadera mananu piareia boa fo, na Allai arongrea fosa etawai aweu etisangkapa eawemibukafo, esomi we Allai.

<sup>17</sup> Efiai eteyo, “Seng Allaio weMananu Fuba Sewa wa wau, wauno nayai pampang ne tuti nayai kawuru na reantenang pari foa foi.

Ametohong mahikai we wau, we boinawi nemu mambiriu fuba wa ampa, tuti wemananu we ru nunei to.

<sup>18</sup> Kaiwasa etaroanso wau kaha fosa ehasoua etang wawerasa we wau, wape rahidafe mai ampa we boinawi nemu kasouwa tuti kutu kaiwo kariri mano emarareha fosa. Tuti rahida wé bohong fiembaitafo we nemu womingfosa foi andinini, amani we nemu nabifosa tuti nemu intontarai emararebana fosa kiai, tuti mano etato wonomuwai fosa, katui ete fuba.

Tuti rahida we mungno mano emei kanggani nunei foi andinini.”

<sup>19</sup> Ainanaya Sempaisi ne Munufoi na rorafaisi tifai, tuti Buruao wiatai na munu rorong foi nani, wati pari, amani ne tarai kariri buruao fafongfa Allai ne Kaiwo Arerai dohonai we Musai fo watai nai foi dine. Kaiwewafoi keiwewari pampang,

kadidufoi sara, mundiei fiorirouwai, tuti metang para kamiei foi miung.

## 12

### *Wiwingfoi tuti tawai naga foi*

<sup>1</sup> Ainanaya iwati fitantuma fiabai bei na rorafaisi, fitantuma nani dohong yau ipapuhung wei paria. Amani iwati wiwing manei ne taraifoi sambewarai weo sensuni na wofoi. Awengfo doa sau embaifoi tuti sata sapewi mananu weawaha suraya boru fo na nunggamieifoi. <sup>2</sup> Wiwing nani wearikang tuti bibe weo nuruainso amaina pirahai we minohi. <sup>3</sup> Mayeai iwati fitantuma siai feai na rorafaisi aha. Amani iwati tawai naga fiabai sewa manei, ne tarai toyari tawai fiabaiturehi ete toyari wanggori fubateraha manei, berikahofi toyari abo, mae nunggamieititu, tuti nungkaradoi sura. Na nunggamieititu fo sata sapewi mananu itu nai. <sup>4</sup> Kifa amandaungfoi na rorafaisi, kifafafating awaha bitoya tiafating to nunei meu. Neo fiaufo ato kutu awahafaisi kiai webetorua mani, fiau kariri rabuang bei (%) na rabuang botoru nanai. Tuti doari na wiwingno rerai we minohi nani arongreafu, weo demang we arikangfoi saubaunung mani soni. <sup>5</sup> Mayeai wiwingfoi minohi tuti arikangfoi, amani kaisung dine. Arikang nani andino ambori wemananu we nunei sentenang, ne mambiriu we yu nunei foi mani ne tarai toyari yuo aitatohi besi bei, amani ne mambiriufu fuba tuti yu nunei na tapapa. Nagafoi demang wei we soni tonanai, wape na tantuma wewai manei wewuri weru nagafoi, yuaisi to Allai tuti

ne kadera mananu foa. <sup>6</sup> Mae wiwingfoi wewu ne tarai to katai manano wekamamiei fo, amani kataio Allai meinameni wei foi. Na katai nani etawawuti rahida 1260, ete embai piarua boru.

<sup>7</sup> Tuti iwati mamuna fiabai na rorafaisi, amani Mikhaeli mano wenunggamiei we wewaifosa foi tuti ne wewaifosa emamuna we tawai naga foi tuti ne wewai erariati fosa, tuti emamuna wawerasa tonanai. <sup>8</sup> Wape emamunara mani, nagafoi tuti ne wewaifosa ewemambiriw we etapa Mikhaeli tuti ne wewaifosa kaha. Ampafe ene pari katai na rorafaisi aha tuti etatasa weru rorafaisi. <sup>9</sup> Ehafa kanggung tawai naga fiabai foi aweu, amani tawai tawa na fafong faini dine, ahui we Saminseni ete inggirane, mano wiwiaing kaiwasa na nunei we era sarawai tuti enari sasari fine. Ampefe Mikhaeli tuti ne wewaifosa ehafa kangguni tuti ne wewaifosa weru rorafaisi to nunei meu.

<sup>10</sup> Mayeai tarahuo manei sahu na rawafui fiabai na rorafaisi deyo, “Rahida Allai feriri ne inontaraifosa, tuti deinawi ne mambiriwo, tuti weMananufo, tuti rahidao Mananu Mampariri foi kontai deinawi ne mambiriwo we wemananu, ninaia mani kawariai ampa.

Weo mano dinggai tane doroifosa pampang, amani diru rahida dinggaisa na Allai urengreafoi, Mikhaeli tuti ne wewaifosa ehafa kangguni to nuwausi ampa. <sup>11</sup> Tane doroi eroaso fosa mani eharaikobu Saminseni ampa. Eharaikobui na Domba Antung foi ne rikafoi ne mambiriwo, amani Yesus Kristusi ne rikafoi. Tuti eharaikobui na eteiairai weo Domba Antung foi ene Seng dine. Esobu dadira pariao emarareha kontai ki, wape

emainenang we esodai ne nanai tuti wiro esu to fui weru ene Sengfoi kaha. <sup>12</sup> Ampafe rorawa wau murarising to! Tuti we mano menayai nai wa mea memararising kontai to! Wape karira we mano menayai na nuwai mea tuti na rawanangwai mea. Weo Saminseni biari kawuru to nuwai meuwa tuti kesoua dang wawerahi. Weo deitawanai we wiro sobu rahidafeai bitoya we niari ne karirafo ahang kaha.”

<sup>13</sup> Tawai naga foi detioai we ehafa kangguni to nunei meu fo nanai, dawi wiwing anta minohi tuti kaisung foi finanaya. <sup>14</sup> Wape we-waifosa etohongno romu korowei warapema fiabai boru we wiwingfoi, ampafe sifo weru nagafoi to katai emainenami weia foi, amani na katai minano wekamamiei foi. Tuti na wanai Allai ambori dewawuti paria defuina botoru aburung fea. <sup>15</sup> Ainanaya nagafoi boroabi mereha fiabai foi na borongfo rufang wiwingfoia. Mereha nani ne tarai toyari waya we dedapa wiwingfoi weru katai niyai nai foi. <sup>16</sup> Wape nunei fiata wiwingfoi ne tarai toyari fiai borongfoi we song mereha nagafi boroabiriri nani kiai to kofa. <sup>17</sup> Tawai naga foi kesoua dang wawerahi paria we wiro miung wiwingfoi kaha fefe. Ampafe da rufang wiwingfoi ne arikang siai fosa aha, amani inontaraio etohong kariri Allai ne Kaiwofo tuti eteyo Yesusi mani ene Seng dine fosa. Da wa kiontai ne rai mamuna fosa weo emamuna wesa. <sup>18</sup> Tuti da wa doari na nafarengfo, kesou paria.

## 13

*Andowa kiawariai na rawanangfoi*

<sup>1</sup> Ainanaya iwati andowa memuna manei, kiawariai na rawanangfoi meai. Andowa nani nungkamieie itu tuti nungkaradoi sura. Na nungkaradoi sura fo sata sapewi mananu sura nai. Mae na nungkamieie itu fo soi wang deibera Allai nai fo. <sup>2</sup> Andowa nani ne tarai toyari macan tutul.\* Awerengfo toyari beruang awereng, mae borongfo toyari singa borong. Andowa nini, tawai naga foi dohong mantauni ne mambiriufu tuti ne mananufo wei we wemananu fuba. <sup>3</sup> Iwati na nungkamieie itu fo bei kifari fiabai paria. Fari nani todoni kontai wedayari mireha rai, wape wiwo mireha kahai tuti farifoi denteng ampa. Finanai wedaya inontarai nunesa kiai epapuhung weai paria tuti era riati. <sup>4</sup> Kaiwasafol esomi we tawai naga foi weo mambiri dohonai we andowafi fo, tuti esomi we andowafoi kontai. Efiai eteyo, “Mandoni kontaio ne mambiriufu mai andowa nini kaha. Tutu mandoni wemambiri we dapai rai?”

<sup>5</sup> Andowafoi sobu mambiri weo bioi arongfo deparanding berahi tuti deibabera Allai. Sobu mambiri kontai we wemananu na nunei embai piarua boru. <sup>6</sup> Fioai borong we deibera Allai tuti deikaherao wonongfo, katai dedai minohi nai foi, tuti inontarai fuba enayai na rorafaisi fosa. <sup>7</sup> Sobu mambiri we memuna we Allai ne inontarai emararebana fosa tuti kiraikobusa. Sobu mambiri kontai we yu kaiwasa nunei kiai, amani inontarai na riria bodoni kontai, na kaiwo bodoni kontai, tuti na nu bodoni kontai. <sup>8</sup> Andowa nani kaiwasa fuba nunei kiai esomi wei tante-

---

\* **13:2** Macan tutul mani nehi fiabai memuna toyari harimau.

nang, amani kaiwasao wiro ewonomifo watai na Domba Antung foi, mano emuni mirehara foi, ne Bukufoi kaha. Buku nani, nafafong pario Allai niari nunei kaharai mae, soi kawuru na Buku nani kariri inontarai esobu Waidani fosa foi.

<sup>9</sup> Mandoni dino wetarang mani tarao kaiwo nina.

<sup>10</sup> Mandoni kontaio, mano eroasoai tuti mano eroasoai kaha fo, mandoni dino Allai kiuntuai we eru aitamusoi mani, todoni kontai wenani ambori eru aitamusoi kaririai ki.

Tuti mandoni dino Allai kiuntuai kawurua we mireha na fimamunafo mani, todoni kontai wenani ambori inontarai emuni kaririai ki. Ampafe inontarai emararebana fosa, todoni kontai etawansa na dadira esodairai ria andowafoi fo, tuti eroasoia mutu, wiro esu to fui fanai.

### *Andowa siai kiawariai na reitahafoi*

<sup>11</sup> Mayeai iwati andowa siai manei kiawariai na reitahafoi aha. Andowa nani nungkaradoi boru, une tarai toyari domba antung nungkaradoi, wape rawafuifoi toyari tawai naga rawafuifoi.

<sup>12</sup> Na andowa mano reantenang foi ne mambiri-ufu tuti na wonongfo, wedaya kaiwasa fuba nunei kiai esomi we andowa reantenang foi, mano ne kahaifoi dentengna foi. <sup>13</sup> Niari fitantuma fiabai tuti flainawiai bitoya. Ampafe na kaiwasa bitoya foi earomireafo, niari adia bei biari na rorafaisi to nunei meu. <sup>14</sup> Niari fitantuma tonanai na andowa reantenang foi wonongfo tuti na ne mambiriufou, ampafe na fitantuma nanai, weanggari kaiwasa fuba niayai na nufi nini kiai, tuti demisa enari aririwang manei ambori esomi we andowa reantenang foi nai, amani mano kifari na sondu bei,

wape denteng ampa. <sup>15</sup> Tuti sobu mambiriu kontai we niari aririwangfoia darang, medu tuti yurai, ampare miungno kaiwasa fuba eteiyari fosa. <sup>16</sup> Andowa mano wefuia foi denggoa kaiwasafoi kiai we esobu fiainawiai na ewarami domoya foi ete na erewomifo, amani kaiwasa nunei kiai, katui tuti fuba, mano ene fi tuti mano bireri fosa, womingfosa tuti woming kaha fosa kontai, tuti mandoni kontai, we esobu fiainawiai na ewarami domoya foi ete na erewomifo. <sup>17</sup> Ampefe mandoni dino wiro sobu fiainawiai nana na ne taraifoi kaha, wiro dawayangfi ete wewori fi ahang kaha. Tuti fiainawiai nani mani, wonongno andowa reantennang foi, ete angka kariri wonongfo.

<sup>18</sup> Ampafe we waitawang kariri fi ninaifa mani, todoni kontaio obu aunaufu. Mandoni dino sewai mani, ambori deto kariri angkao deinawi kariri andowafoi nani, amani deto ruhi angkao ene nomorifo ambori sobu angka we wonongfo. Weo angka bonani mani kaiwo netawehai weo angka kariri inontarai. Ne angka mani 666.

## 14

### *Domba Antung foi tuti ne inontarai ewe-144.000 fosa*

<sup>1</sup> Mayeai iwati aha mani, iwati Domba Antung foi doa na uai Sioni. Tuti iwati inontarai ewe-144.000 etoari riati kontai. Inontarai nanisa na erewomifo kiai soi Domba Antung foi tuti tamang Seng Allai uwonomifo nayai. <sup>2</sup> Tuti tarahuoi fi dotu fiabai paria na rorafaisi, nubuayai toyari mereha sabi na dofiro tuti toyari kadidu fiabai nubuayai fenanai. Fi dotu tarahuoi nani ne

tarai toyari kaiwasa emei na musikio esahui we kecapifoi. <sup>3</sup> Ampafe iwati kaiwasa ewe-144.000 etoari na Allai arongreafo, fidarang mana fosa tuti mano ewewafoniai eminohi wari Seng Allai na ne kadera mananu fosa. Inontarai ewe-144.000 nanisa erohi rarung weworu bei, rarung nani manei siai wemambiriw we deitawani kaha. Kaiwasa ewe-144.000 nanisa mani Sengnei feririsa weru nuneia fo saine. <sup>4</sup> Ea mani, inontarai emararebanai toyari mano wiro etena ria wiwing kaha, mano wiro esomi we fieai siai kaha, tuti era ria Domba Antung foi to katai doni konta fosa. Inontarai nanisa Allai biai kutusa ampa na kaiwasa fuba nunei kiai. Ne tarai toyari inontarai etohongno fi reantenang esobuai na fi eru fo we Allai fo, ea kontai tonanai, amani mano reantenang ohonsa we Allai tuti Domba Antung foi saine. <sup>5</sup> Inontarai nanisa ewaitawang epampamu na wea kaha tuti enari sara fi kutea kahai arorawa.

*Wewai mantoru fositoru tuti kaiwo itomadura fo*

<sup>6</sup> Mayeai iwati wewai siai manei aha, iwatiodi we sifo na rorafaisi. Wewai nani meinanang we sahu tuti Allai ne Kaiwo Mahikaio, watai we numainu fo, amani ne Kaiwo Mahikai kariri Yesus Krisuti feriri kaiwasanei, sahu tutirai we kaiwasa fuba nunei kiai, amani we inontarai na riria bodoni kontai, na kaiwo bodoni kontai, tuti na nu bodoni kontai. <sup>7</sup> Wewaifo medu na rawafui fiabai deyo, “Allai meiri andino memataiti tuti metaparandini ne. Weo rahidafe mai we kiutu kaiwo kariri nunei to. Mesomi wei, andino niari rorafaisi tuti nunei ne, rawanangrausi, tuti waya ureng fo.”

<sup>8</sup> Wewai mano reantenang foi medua kaia, mayeai iwati wewai mano sua ahang foi kiawariai aha ma tuti suhu deyo, “Misuhit! Bendari fiabaio Babeli misuhib Beyari ampa. Bendari nani dino raminde wedaya kaiwasa na katai doni kontai etunung ne angguri kerira foia emayeru emaninawa funomai. Amani wedayasa enari maino fikarirafoi kiai.”

<sup>9</sup> Mayeai wewai manei aha, amani mano mantoru foi, kiawariai aha, tuti suhu na rawafui fiabai deyo, “Mandoni kontai esomi we andowafoi tuti ne aririwangfoi tuti esobu fiainawiafo na erewomifo ete na ewaramifo fosa mani, <sup>10</sup> inontarai nanisa ambori Allai kesousa paria tuti sousa ahang kahai mae yu aibooisa na mambiriu paria. Ne kesou maraba fuba nanai ne tarai kariri sari angguri bitoya tono ne moki rorong foi pariao sefang paria, tuti etunumi kiai, nana mani esodai karira paria we Allai kesousa tonana fefe. Tutti ambori esodai dadirafo paria na Adiao webelerangno denggararu foi rorongfo ki, na wewai emararebana fosa earomireafo tuti na Domba Antung foi arongreafo. <sup>11</sup> Adiao wedaya esodai dadirafe nani, wiro fefe na wea kaha. Ampafe inontaraio esomi we andowafoi ete ne aririwangfoi tuti esoi andowafoi wonongfo we fiainawiai na ene taraifo nanisa, ambori esodai dadirafo, diru rahida, pariao we fitawafa.” <sup>12</sup> Ampefe inontarai emararebana fosa, amani mano etohong kariri Allai ne Kaiwofo, tuti mano eroasoia mutu, eraria Yesusi pampang, tuti wiro esu to fui kaha fosa, todoni kontai etawansa na dadira rorong esodaira fo ki.

<sup>13</sup> Ainanaya itarahuo rawafui bei na rorafaisi, medu deyo, “Toi finina: Na ninai to fongna mani, mano eroaso Sempaisi fosa, emarareha mani, Al-lai mioansa paria.” Tuti Allai Nuaninufoi yoa tubarai deyo, “Yo, tarai to! Ea ambori erufi aha ewaramitafa kaha, weo esobu fiembaitafo na fi eru na nunei fo ki.”

*Allai kiutu kaiwo we nunei, ne tarai kariri mandohong romi deting ne aibong sanamifo*

<sup>14</sup> Ainanaya iwati aha mani, iwati kafafe biua bei na arohurea ne, tuti manei minohi nai. Wenani mani ne tarai kariri Kaisung Inontarai foi. Na nungkamieifoi mani satao sapewi mananu emasi bei nai, tuti yuo umbe sabiti reisa bei na warangfo. <sup>15</sup> Ainanaya iwati wewai manei siai aha kiawariai na Sempaisi ne Munufoi ariei tuti sahu we mano minohi na kafafe wowong foi fo na rawafuifoi fiabai deyo, “Ka nemu umbe sabiti wai we kutufi to, weo rahidafe mai ampa we kutu aibong na nuwausi ampa, we aibong na nuwausi miraia kiai ampa.” <sup>16</sup> Ampefe mano minohi na kafafe wowong foi fiating ne umbe sabiti foi kifari we kiutu aibong nuwausi kiai, tuti na tonanane fianduhi aibongfoi kiai kiari to ne kataia wiatai nai.

<sup>17</sup> Ainanaya wewai manei siai aha da na Sempaisi ne Munufoi ariei. I kontai yu umbe sabiti reisa bei na warangfo. <sup>18</sup> Tuti wewai manei siai aha da na mesbafoi, amani wewaio yutawang adia we keso fi na mesba wowong fo. I kontai sahu na rawafuifoi fiabai we wewai mano anta yu umbe sabiti reisa foi fo deyo, “Ka nemu umbe

sabiti wai tuti kutu aibong angguri weru ari-rawangfo kiai, weo aibong angguri na nunei kiai mirai ampa.” <sup>19</sup> Ampefe wewaifoi fiating ne umbe sabiti foi kifari to nunei sentenang aweu, fianduhi aibong angguri fo kiai nai, akawurua soi tono katai fiabaio etaha kangguni nai bei. Katai etaha kanggung aibong angguri nai nani mani, kaiwo yiwansoai weo Allai ne kasoufo tuti todoni kesou inontarai nunesa paria fo. <sup>20</sup> Aibong anggurine kiai etaha kangguni na katai etaha kanggung aibong angguri fo nai foi na bendari do boriai foi, tuti rika deda nai, ne tarai toyari waya dedari. Rika nanai deda tonanai toyari wayao waroio kilometeri 300 teai, tuti berorongfo mani adareti meteri boru.\*

## 15

### *Wewai itu fo tuti aiboi beitu fo*

<sup>1</sup> Mayeai iwati fitantuma fiabai bei na rorafaisi, fitantuma nani dohong yau ipapuhung wei paria. Amani iwati wewai ituo Allai demisa era ma we eboi nunei fosa na fimung itu fo. Na fimung itu nanai Allai ne kasou we inontarai na nunei fosa, kai finanaya. <sup>2</sup> Tuti iwati fi ne tarai toyari rawanang kasinai bei, tuti adia denggararu nai. Na rawanang kasinai foi dereungfo, iwati inontarai manea etoari nai. Inontarai nanisa mani inontaraio etirapa andowafoi, ne aririwangfoi, tuti ne angkao yiwang kariri wonongfoa fo saine. Etoa mae eru musikio esahuai we kecapifo na

---

\* **14:20** 300 km. mani, na kaiwo Yunani mani soi ‘1.600 stadia’. Tutu berorongfo meteri boru mani, soi ‘dedai kariri dedaio wai borongfo na kuda manei’.

ewaramifo, kecapi nanai kecapio Allai dohonai wesa fine. <sup>3</sup> Etoa mae erohi rarung bei, amani rarungno raminde Allai ne womingno Musai yohi foi tuti Domba Antung foi yohi foi. Rarung nani dotu tonina:

“Seng Allai wau weMananu pari sewa ne,  
fi nari wa fuba, wedaya kaiwasa epapuhung,  
tuti ehiri ewaramifo.

Wau mani weMananu we fitawafa,  
fiani kontai aino nari wa masi tuti wetarai.  
<sup>4</sup> Sengne waune, mandoni dino mitai wau kaha  
tuti deparanding wonomuwai kaha ne?

Weo meiri wauno murarebana ne.  
Kaiwasa na nu bodoni kontaio era ma esomi we  
wau,  
We mandoni kontai deitawanai we fi masio nariri  
wai kiai wetarai.”

<sup>5</sup> Mayeai iwati aha mani, iwati rorongno Sempaisi minohi nai na ne Munufoi na rorafaisi tifai.  
<sup>6</sup> Ainanaya wewai ituo eha aiboi fimung beitu fosa etariai na Sempaisi ne Munufoi ariei. Ansung esansuna fo buao karofari toyari kaiwewa fe-nanai, tuti na ansung esansuna fo arongfo, esoru ireu aburung enari na emasi feai. <sup>7</sup> Mayeai manei na fidarang mana fosa, dohongno rewangguai wenofi ituo enari na emasi fo we wewai itu fosa. Rewangguai wenofi nanai sefang na Allai, mano minohi na numainu foi, ne kasoufo. Aiboi nanai Allai dohonai we bioi nunei naya fine. <sup>8</sup> Tuti Seng Allai ne mambiriu fiabai foi, tuti ne sambewaraio dadai fo, wedaya ne Munufoi sefang na riraung. Ampafe mandoni kontaio wiro wemambiriu we suai afui kaha, paria aiboi beitu wewai itu fosa etohona fo kai.

## 16

*Allai ne aiboi beituo bioi nunei nayafo*

<sup>1</sup> Ainanaya tarahuo manei medu na rawafui fiabai na Allai ne Munufoi we wewai itu fosa deyo, “Mera wa mesari Allai ne kasouo watai na rewangguai wenofi fo to nuwausi aweu. Amani na ne aiboi beitu fo.”

<sup>2</sup> Ainanaya wewai mano reantenang foi da wa wiowu Allai ne aiboi reantenangno meinameni na ne rewangguai wenofi yuti foi to nunei meu, we bioi nuwausi nai. Ampafe aiboi wewaifoi wiowui to reitahafoi nani wedaya mano esobu andowafoi ne capifoi na ene taraifoi tuti esomi we ne aririwangfoi sa, esobu fimung, amani esodai fafororang kerira paria na ene taraifoi tuti fafororang nani kiurunsa paria.

<sup>3</sup> Mayeai aha mani wewai mano mandu foi da aha, tuti wiowu Allai ne aiboi bo boru foi meinameni na ne rewangguai wenofi foi to rawanangfoi aha weu. Ampafe aiboi nanai wedaya rawanangfoi werika toyari rumang fenanai. Tuti finanai wedaya fifuba niai nai foi mirehara kiai.

<sup>4</sup> Mayeai aha mani wewai mano mantoru foi, wiowu Allai ne aiboi bo botoruo meinameni na ne rewangguai wenofi foi nani to wayafo tuti waya ureng fo aweu, wedaya wayafo tuti waya ureng fo werika kiai. <sup>5</sup> Ainanaya tarahuo wewai mano wenungkamiei we merehafo kiai foi medu deyo, “Allai wauno Murarebana ne, wauno nayaifa pampang paria sobu nina ne tuti nayai kawuru na reantenang pari foa foi di wau. Aiboi bohonai we nufi ninai masi paria. <sup>6</sup> Weo kaiwasa

esodai aiboife ninisa, raminde emung nemu inontarai emararebana fosa kawuru ampa tuti nemu nabifosa ampa ampefe ene rikafo deda paria. Ampafe ea kontaio esodai nemu aiboi tonana fo, amani etunung rika nani. Tutti aiboi tonana fo masih paria we esodairai.”<sup>7</sup> Ainanaya tarahu rawafui bei na mesbafoi deyo, “Tarai! Seng Allai wauno weMananu pari sewa ne, aiboi bohongna wa wetarai tutti masih.”

<sup>8</sup> Mayeai wewai mano mana foi, wiowu Allai ne aiboi bo boa na ne rewangguai wenofi foi nani to wofoi aha. Wedaya wofoi meningkapoi fuba paria, tutti niunungrarafu inontaraifosa toyari adia rerafusa. <sup>9</sup> Ampefe wo meningkapoi nani, niunungrarafu ene taraifoia wekahai, wedaya eteibera mano dohong fi mung foi wonongfo, amani Allai. Esodai ne karirafo tonanai ki, wape wiro etaraberasa weru ene sasarifoi kaha tutti etaparanding Allai kaha.

<sup>10</sup> Mayeai wewai mano ring foi wiowu Allai ne aibooi na ne rewangguai wenofi foi nanai to andowafoi ne kadera mananu foia. Wedaya katai wemananu wei foi memantiti sentenang. Ampafe na mamantiti rorong nani, wedaya fimung esodairi foi damissa awao ehiri etaperemifo. <sup>11</sup> Ampafe eteibera Allai na rorafaisi we fafororang dohonsa etamira foi tutti fimung siai wei fo. Esodai ne tonanafo, wape wiro emaya we etaraberasa weru sasari enariri foi kaha.

<sup>12</sup> Mayeai iwati wewai mano wonang foi aha, da wa wiowu Allai ne aiboi bo wonang na ne rewangguai wenofi foi nani to waya fubao Efrati aweu. Finanai wedaya wayafoi sirarang ambori

meinenang we mananu na do wo dautai nai fosa era kutuai nai we emamuna. <sup>13</sup> Ainanaya iwati nuaninu kerira mantoru, itone tarai toyari kidowa. Itohawariai na tawai naga foi, andowafoi tuti nabi tarai kaha foi itoboromifo ariei (nabi tarai kaha foi mani ahui kontai we andowa mano mandu foi dine\*). <sup>14</sup> Finani sitoru mani, nuaninu kerira itonari fitantuma bitoya sitoru ne. Nuaninu kerira nani sitoru, itora wa itofanduhi mananu fuba nunei kiai we emamuna na rahida fubao Allai, Mano Wemanananu pari sewa foi, kiutu kaiwo kariri nuneifo.

<sup>15</sup> Sengnei medu deyo, “Metarami ma! Ira toyari inontarai kiamananapi mau rai. Mandoni dino denansiau weduarai tuti meinenang pampang we deitawang ne ansungfo, ambori wiro da arora kaha tuti mimaya kaha, wenanai imoani paria.”

<sup>16</sup> Ainanaya nuaninu kerira fo sitoru, itofanduhi mananufosa na kataio na kaiwo Iberani mani esahui we Hermagedonifo.

<sup>17</sup> Mayeai wewai mano itu foi, wiowu Allai ne aiboi meinenamei na ne rewangguai wenofi foi nani to rorafaisi meu. Ainanaya tarahuo manei sahu na rawafui fiabai na kadera mananu foi na Sempaisi ne Munufoi, deyo, “Allai ne aiboifo kai finanaia!” <sup>18</sup> Mayeai kaiwewafoi keiwewari tuti kadidufoi sarabaurai, tuti mundiai fiabaiturehi bei fio. Mundiai fiabai tonana nei wiro fio na wea kaharai, na reantenang Allai niari inontarainesa fo paria sobu rahida bonini. <sup>19</sup> Mundiai nani wedaya bendari fuba foi tibau webetoru tuti kaiwasa na nuo etaroanso Allai kaha ene bendarifo kontai woru. Weo Allai deti we Bendari

---

\* **16:13** Botio robongno 13:11-17.

Fuba Babeli nania tuti yu aiboio ne inontaraifosa, amani dohonsa etunung angguri deinawi kariri ne kasou fenanai na ne mokifoi. <sup>20</sup> Nufo daisuia kai tuti uaifo musuhi. <sup>21</sup> Metang esi foi miung, metang nani ureng bei mani miraba kiro piarua sura teai. Metang ureng nani sawai meu miung kaiwasanesa. Ampafe inontarai esodai fi nanisa eteibera Allai paria, weo fimungno metang kamiei esodairi nanai, maraba paria fefe.

## 17

### *Wiwing wedaya kaiwasa enari sasari foi tuti ne andowa dautai nai foi*

<sup>1</sup> Mayeai manei na wewai ituo eha Allai ne aiboifo we nunei meu fosa, da ma medu deyo, “Ro ma, ambori yeinawiai we wau kariri todoni Allai dohong aiboifo we wiwing diruo wewonong foi nani, mano minohi na bendari fuba ebauni kefang we waya bitoya foi fo. <sup>2</sup> Wiwing nani wedaya mananu fuba nunei kiai, enari sasari maninawa fo riati tuti wedaya inontarai nunesara ene tarai toyari emayeru na ne angguri kerira foi, ampafe etitua we fi enari fo kahai, mae etawayang funongsa kontai.”

<sup>3</sup> Ainanaya Allai Nuaninufoi sensoni yau tuti iwatioai we wewaifoi kia yau to katai sirahiai wekamamiei fo. Na nanai iwati wiwing manei, minohi sau andowa manei kurungfo. Andowa nani berikahofi toyari abo tuti na ne taraifoi sentenang soi kaiwo tuti wang bitoyao deibera Allai nai fo. Andowa nani nungkamiei itu tuti nungkaradoi sura. <sup>4</sup> Wiwingfoi ansung sensuna

fo kehe werawanderi tuti barika toyari abo. Mae mianai na emasi, kamamieio ne harga dedai, tuti fi ne tarai toyari raorio esahui we mutiarafoi.\* Mae na warangfo yu moki emasi bei, moki nani sefang na fi piro kerira niari fo tuti ne maninawa poro fo. <sup>5</sup> Na rewongfoi soi wangfeai. Wang nani ne fiainawiafo wiro deisaha para kaha, wape dotu kariri ne fi karira niari fo. Wangfo dotu tonina:

BABELI FUBA!

NEUNG TANAMAI WE WIWING DIRU KIAI  
TUTI WE FI KARIRA PIRO FOI KIAI!

<sup>6</sup> Tuti iwati wiwingfoi meyeru we dunung Allai ne inontarai emararebana fosa ene rikafoi, amani mano eteyo Yesusi mani ene Seng dine fosa.

Iwatioi mani ipapuhung paria. <sup>7</sup> Ainanaya wewaifoi medu we yau deyo, “Fiani popuhung wei ne? Fi botioai nanai, amani wiwingfoi tuti ne andowa dautai nai foi, mano nungkamiei itu tuti nungkaradoi sura foi, ne fiainawiafo ambori yeikaririai we wau ki. <sup>8</sup> Andowa botioi nani, raminde nanai niayai kawuru na nunei, manamo mirehafo waroi ampa. Wape katu mani kiawarai na Kamirei Berorong foi meai, we sodai ne kari-rafoa wioru ki. Kaiwasa nuneisa ewatiao we da aha ma fo nanai epapuhung wei paria. Weo raminde nanai niayai kawuru na nunei, tuti mireha wape ambori kiawariai aha wedayasa epapuhung tonanai. Kaiwasa nanisa mani, inontaraio reantennang pari Allai niari nunei kaharai mae wirosi ewonomifo na ne Bukufoi kaha fo saine, amani Bukuo soi kariri mano esobu Waidani fosa foi.

---

\* **17:4** Mutiara—Kamamie reifofa niai na firai kamitatarai doa na katai murutufoi rorongfo. Mutiara mani ne harga dedai paria.

<sup>9</sup> Ampafe fininaifa mani, manei sewai tuti sobu aunaufo na mai fino deitawanaifa fe. Andowafoi nungkamieie itu fo mani deinawi wiwoi ituo wingfoi minohi naya fo <sup>10</sup> tuti mananu ituo ewemananu fosa. Mananu itu nanai, ewering emarareha ampa, manei wemananufe nendai, tuti manei kontaio wiro kiawaria kaharai. Mano kiawaria kaharai nani da ma mani, wiro wemananu waroi kaha. <sup>11</sup> Tuti andowa mano raminde nanai niayai na nunei, wape mirehara foi tuti katu mani kiawariai aha ma foi, i mani mananu mano indeatoru dine. Tuti i mani kiontai mananu itu fosa. Tuti katu mani da we sodai ne karirafo na rawanang adia foi finina.

<sup>12</sup> Andowafoi nungkaradoi sura botioa fo mani, deinawi kariri mananu surao wiro eru wang mananu fo kaharai fosa. Wape ambori esobu mam-biriu we eru wang mananu fo araha ureng boyari, ria andowafoi ki. <sup>13</sup> Mananu sura ninisa kiai ewe-boyari we etohong ene mananufo tuti ene mam-biriufo we andowafoi. <sup>14</sup> Ambori emamuna we Domba Antung foi, wape wiro ewemambiriu we etapai kaha. Weo Domba Antung foi kiraikobusa, weo i mani Seng fuba dedai sewa seng nunei kiai dine tuti Mananu fuba dedai sewa mananu nunei kiai dine. Tuti ne inontaraifosa, mano sahusa, mano dirisara fosa, tuti mano wiro esu to fui werui kaha fosa, ea kontai emamuna riati.”

<sup>15</sup> Mayeai wewaifoi deisaharai kontai we yau aha deyo, “Mereha fuba botioi kiai na katai wing diru foi minohi nai foi mani, deinawi kariri inontarai fuba nunei kiai, amani inontarai na riria bodoni kontai, ete na kaiwo bodoni kontai, tuti na nu bodoni konta saine. <sup>16</sup> Andowafoi

tuti nungkaradoi sura anta botioai nanai, ambori enemirireu wiwing diru wewonong foi. Ne fi minohi tutira fo kai etawarai weruri tuti efating ne fiawawafoa doa arora. Etang ne taraifoi, tuti enunumi na adia. <sup>17</sup> Mananu sura fosa enari tonanai, weo Allai dino wedayasa ambori enemiro-rong dohong we enari finana fo. Ampafe enari kariri fi dawi wea fo. Amani eweboyari, etohong ene mananufo we andowafoi ambori andowafoi wemambiriw we wemananu paria fianai aino Allai medura fo mai kaririai. <sup>18</sup> Mae wiwing botioi nani mani, deinawi kariri Babeli, bendari fubao yu mananu siai nunei sentenang foi dine.”

## 18

### *Babeli misuhi*

<sup>1</sup> Mayeai aha mani, iwati wewai siai manei biari na rorafaisi meu. Ne mambiriwo fuba tuti ne taraifoi sambewarai toyari wofe nanai, we sambewa nunei. <sup>2</sup> Sahu na rawafui fiabai deyo, “Misuh to! Bendari fiabaio Babeli misuhi beyari ampa! Kaiwasa wiro eminohi nai ahang kaha, mae ninaia mani, inggirafosa tuti nuanuni eharira fosa enariri we ene katai ampa, tuti romu kerira werarika foi kiai enariri kontai we ene munu. <sup>3</sup> Weo kaiwasa fuba nunei kiai enari maninawafo riati, ne tarai toyari etunung ne angguri deinawi kariri fikerira pari niariri foi. Mananu nunei kiai enari maninawafo riati, tuti mano ewaworifi etawayanai ahang fosa esobu ra bitoya paria na ne maninawafoi, weo etawayang fikirira bitoya we kaiwasa na Babeli, fio ne harga dedai fine.”

**4** Ainanaya tarahu rawafui siai bei na rorafaisi medu deyo, “Nehu inontaraiwa meaine, mera weru bendariwai to boriai ambori wiro mehontai na sasari ne kaiwasafa etohoni nani fanai, tuti ambori wiro mesobu ne aiboi fimung fo konta fanai.

**5** Weo sasari enariri foi tibuka awiai sobu rorafaisi ampa, tuti Allai aroporo sasari kerira enariri tonana nei kaha.

**6** Ampefe, mano metohong aiboi we bendari Babeli wa mea, fi kerira kiai raminde Babeli niariri we inontaraifosa wai, menari wei tonanai fuba sewa aha. Raminde nanai niari fi kerira bitoya wedaya inontarai siai esodai ne karirafo. Ampefe ninaia mani, meriwang ne dadirao niari tonana fo we mantauni aha, tuti ne metohonai wei fo weberu aha.

**7** Fianai aino raminde sobuaia fo, amani minohi na ne mai pari fo tuti sobu fi bitoya paria, kariri finanai, ninaia mani, metohoni sodai dadirafo tuti enerorong fituayai fuba tonanai kariri ne mai sobuaia nanai. Weo deparanding berahi pamphang, deyo, ‘Yau mani wiro wiwinao urehukuru dada na wea di yau kaha, mae wiwing iwemananu di yau.’

**8** Deparandini tonanai ampare na rahida boyari kawuru sodai kipa fimung karira fo beyari, amani mararehafoi, enerorongfoi fituayai tuti kaharifo. Tuti ambori adia kasoi kiai, weo Allai mano dohong aiboifo wei foi mani, Seng Allaio wemambiriu sewa dine.

**9** Mananu fuba nunei kiaio enari maninawafo riati tuti eparaise na firamaranding enari fenani,

ewati riraungfoi we dautai nai ayai nanai, ambori esaia etайду we bendarifoi ki. <sup>10</sup> Ematai ao etohong baba kahai, ampefe etoari na waroi mae emadu eteyo, ‘Aro! Bendari fiabai Babeli sodai ne karirafo paria. Babeli bendari wemambiriу foi, na araha ureng boyari kawuru mae wioru.’

<sup>11</sup> Mano etawayangfi na nunei sentenang nesa esai tuti enemirorongfoi fituayai wei, weo manei wiori fi etawayangna fo ahang kaha fefe. <sup>12</sup> Weo Babeli wiori fianggeng bitoya paria nasa, toyari emasi, peraki, kamiaio weharga dedai fo tuti mutiarafo, kontai ireu mahikaio biua karofari fo, ireu werawanderi fo tuti berika toyari abofoi. Kontai fianggengno enariri na aio wiرو obu funomi kaha foi, fianggeng enariri na gaja uboreng foi, na aio ne harga dedai foi, na tembaga, besi tuti na kamieи mehikai foi. <sup>13</sup> Tuti ai memisi rerawa, finunsai mampori fo, muri, kemenyang, angguri, maning, tepung tuti patibu, sapi tuti domba, kuda tuti oto kuda yabitи fo, tuti womingno afai mamuna fosa etafusa fosa. Finanai kiai anta etawayanai wei, tuti etawayangno inontarai wei kontai. <sup>14</sup> Mano etawayangfi nanaisa, emadu we wiwingfoi, amani Babeli, eteyo, ‘Fianggeng fuba enemurorong dohong wei foi tuti fio puraiserai na rahida neungne, toyari bampi na mai tuti fio denteng miang nemu taraiwai nai fi, wiorua kiai ampa, tuti wobui na weai ahang kaha.’

<sup>15</sup> Inontaraio etawayangfi we bendarifoia esobu ra bitoya nai nanisa, ambori ematai ao etohong baba kahai, etoari na waroi mae esaia etайду we bendarifoi. <sup>16</sup> Emadu eteyo, ‘Aro! Bendari fiabai Babeli nini sodai ne karirafo paria. Ne tarai toyari

wiwingno sensuni na ireu biua karofari foi, ireu ne harga dedaio werawanderi foi tuti ireuo berika toyari abofoi. Tuti miang ne taraifoi na emasi, kamiai weharga dedai tuti mutiara. <sup>17</sup> Wape araha ureng boyari kawuru mae ne fianggeng fuba nani wiorua kiaia!

Inontarai mano ehai kapari fosa, inontarai etontai na kapari fosa, mano erufi na kapari fosa, tuti inontaraio eha fianggeng etontai na kaparifoi we etawayanai fosa, etoari na waroi. <sup>18</sup> Ewati riraungfoi dautai na bendarifoi ayai nanai, etaidu wei eteyo, ‘Bendari na doni kontaio wiro mesi bendari fiabai nini kaha.’ <sup>19</sup> Ampafe ehafung kangganangso enumifo we fiainawiaifa we enemirorongfoi fituayai we bendarifoi tuti esaia etaidu wei eteyo, ‘Aro! Bendari fiabai nini sodai karirafo paria. Bendari nini wedaya kaiwasa fuba etontai na kapari fosa esobu ra bitoya ampa. Wape na araha ureng boyari kawuru mae ne fianggengfoi kiai nani wiorua kiai.’

<sup>20</sup> Mano menayai na rorafaisi mea, memararising we fi sodaira fo! Tuti inontarai memararebana wa mea, rasuliwa mea, tuti nabiwa mea, memararising kontai we fi sodairai nanai! Weo Allai dohong aiboi wei, we biai karirao raminde nanai niari we meara fo.”

<sup>21</sup> Mayeai wewaio wemambiri manei yuai kamiei fiabai turehi bei, soi to rawanangnei meu tuti medu deyo, “Bendari fiabai Babeli waune, toyarine wau kontai Allai ambori so kanggung wau na mambiri tonanai kontai ki, ampafe wiro ati wau ahang kaha. <sup>22</sup> Nemu inontarai emei kecapi fosa wiro taramiosa we emei ahang kaha, mano

erohi fosa, mano ebui suling fosa tuti ebui songgerifosa, wiro taramiosa we erohi, ebui suling tuti ebui songgerifo na wea ahang kaha. Wiro obu inontarai deitawang yufi manei na nanai ahang kaha, tuti taramio kamiei fiabai riroya patibu nai foi wedotu ahang kaha. <sup>23</sup> Wiro ati padamarangfei wedenggararu nai ahang kaha, tuti kaiwasa enari muniara mandirau nai ahang kaha kontai. Weo raminde nanai nemu inontarai etawayangfi wasa mani, inontaraio ewe-ewonomi paria na nunei saine. Tutti na nemu rawang kerira wai weanggari kaiwasa fuba nunei nai.

<sup>24</sup> Weo Babeli wau mungno nabifesa ampa, tuti Allai ne inontarai emararebana fosa ampa. Wonong we mandoni kontai mireha tonana fo, wauno waramu rikaosa ne.”

## 19

*Kaiwasa na rorafaisi erohi eparaise we Babelio wiorufo*

<sup>1</sup> Mayeai aha mani, tarahuoi we na rorafaisi kaiwasa bitoya erawamifuiroi nubuayai paria, esahu eteyo,

“Haleluya! Tane Seng Allai, tafiai,  
weo andino feriri tata ne,  
andino tataparandini ne,  
andino wemambiriu ne!

<sup>2</sup> Tafiai, weo kiutu kaiwo na mai tuti wetarai.  
Kiutuaifa ampa we dohong aiboifo we wiwing  
diruo fuba foi,  
mano na ne maninawafo wedaya kaiwasa  
nunei eharira kiai ampa.

Allai miuni tonanai we biai ne inontaraifosa ene rikao raminde wiwing diru foi miunsara fo.”

<sup>3</sup> Tuti esahu aha eteyo,

“Haleluya!

Weo adia kaso wiwing diru foi nani ne ri-raungfoi sinu we fitawafa!”

<sup>4</sup> Mano ewewafoniaio ewepiareia mana fosa tuti fidarang mana fo, etisangkapa eawemibukafo esomi we Allai mano minohi na ne kadera mananu foi fo, tuti eteyo, “Antu! Haleluya!”

<sup>5</sup> Ainanaya tarahuo rawafui bei medu na kadera mananu foi deyo, “Mefiai tane Seng Allai, mea kiai, mano mewewoming we Allai tuti mano mesomi wei ne mea, katui ete fuba!”

### *Domba Antung foi tuti ne muniara mandirau foi*

<sup>6</sup> Mayeai tarahuo fieai toyari kaiwasa bitoya paria esahu. Erawamifuifoi fiabai dotu toyari dofiro nubuayai tuti kadidu dotu fenanai. Emadu eteyo,

“Haleluya!

Weo tane Seng Allaio wemambiri sewa ne, andino wemananu ne.

<sup>7</sup> Tamararising, taparaise tuti tataparandini.

Weo rahida Domba Antung foi rirau nai fi kiarai ampa

tuti kadawing dauti fi meinename kontai ampa.

<sup>8</sup> Allai dohong ansung mirarebanai bua karofari tuti kaiwewa fo  
we kadawingfoi we sensung nai.”

(Ansung mirarebana nanai deinawi Allai ne inontarai emararebana fosa fi masio enari kariri ne dawiafo aine.)

<sup>9</sup> Ainanaya wewaifoi medu we yau deyo, “Woi fininai, ‘Mandoni dino Allai wenoti to Domba Antung foi ne muniara mandirau foi mani, sobu moanafo riati.’ ” Mayeai medu aha deyo, “Kaiwo ninai, kaiwo tarai na Allai fine.”

<sup>10</sup> Tarahuo kaiwofo nanai, itawai aweu isangkapa awehubukane na arongreafo we isomi wei. Manamo medu we yau deyo, “Nana fanai! Wiro womi we yau fanai, weo yau kontaio Allai ne woming di yau kariri wau, tuti kariri nemu doroio eraria Yesusi tuti eru ne aunaufoa mutu fosa! Mae womi we Allai terai! Weo Allai ne kaiwoariri nabifesa emadura fo mani, deinawiaia kasau ampa we Yesusi mani Seng dine.”

### *Yesusi dautai na kuda biua maneи tuti miungno andowa kerira foi*

<sup>11</sup> Mayeai iwati rorafaisi tifai tuti iwati kuda biua maneи tuti maneи dautai nai. Mano dautai nai foi wonong fino *Wetarai* tuti *Dohong Kariri Allai Ne Dawiafo Na Mai*. I mani kiutu kaiwo na mai tuti memuna we ne aitetafosa na mai. <sup>12</sup> Urengfo suru usambewarai toyari adia fiabai denggararu, tuti sata sapewi mananu bitoya na nungkamieifoi. Soi na ne taraifoi wangfeai, amani wangno wiro maneи siai deitawana kaha, meiri dino deitawana ne. <sup>13</sup> Ne ansung deuroi satari foi werika sentenang, tuti mantauni wonong fino *Kaiwo Allai*. <sup>14</sup> Rai mamuna na rorafaisi sa etautai na ene kuda ebaibua fosa tuti era riati. Rai mamuna nanisa ansung esansuna fo bua karofari

tuti mirarebanai. <sup>15</sup> Sondu reisa bei kiawariai na borongfo ariei. Sondu nani dino memuna naia kiraikobu kaiwasa fuba na nu bodoni konta foi tuti yu kaiwasa nanisa na ne aitatohi besi foi, amani yusa na tapapa. Andino ambori sahariroya anggurio deinawi kariri Allai, mano Wemambiriu Sewa foi, ne kasoufo, na katai etahariroya angguri nai foi ne. <sup>16</sup> Na ne ansung deuroi satari foi tuti na awedungfo, soi wang nina: *Mananu Fiabai Sewa Mananu Nunei Kiai tuti Seng Dedai Sewa seng Nunei Kiai.*

<sup>17</sup> Ainanaya iwati wewai manei doari na wofoi, tuti suhu na rawafui fiabai we romu fuba esifo na rora amau faisa deyo, “Mefanduhi mea to ninai ma, we metampi ruhiae na fiang fubao Allai dohona nei, <sup>18</sup> ambori metangno mananufosa ene taraifoi tuti afai mamuna babao emarareha na mamuna rorong fosa ene taraifoi. Tuti metangno mano etautai na kuda fosa ene taraifoi, tuti kudafosa kontai, tuti kaiwasa fuba nunei kiai, katui ete fuba, woming ete woming kaha fosa!”

<sup>19</sup> Mayeai iwati andowa kerira foi, mananu fuba nunei kiai tuti ene afai mamuna fosa, efan-duhiswa we emamuna we mano dautai na kuda biua foi tuti ne rai mamuna fosa. <sup>20</sup> Wape tefu andowa kerira foi tuti ne nabi tarai kaha foi. Nabi tarai kahai nini dino, raminde niari fitantuma bitoya na andowafoi wonongfo ne. Tuti na fitantuma kerira niariri tonana foi, pempamu kaiwasa bitoyao esobu andowafoi ne fiainawiafo na ene taraifoi tuti esomi we ne aririwangfoi. Tefu surua so suru urarang to Rawanang Adiao webelerang denggararu foi aweu. <sup>21</sup> Mae mananu fuba fosa tuti ene afai mamuna fosa mani, mano dautai

na kuda biua foi miunsa na sondu kewariai na borongfo ariei nani. Ampafe romufosa kiai esifo ma etananggoing rai nanisa ene taraifoia enimifo pising beyari.

## 20

*Kristusi tuti ne inontarai feririsa fosa eru wang mananu defuina 1.000*

<sup>1</sup> Mayeai iwati wewai manei biari na rorafaisi meu. Yu aisu Kamirei Berorong foi ne rahutufoi tuti wai besi fiabai bei na warangfo. <sup>2</sup> Ainanaya tefu tawai naga fiabai foi—tawai kerira tawa foi—amani Saminseni, mano wemananu we inggirafosa foi, wiorahia. <sup>3</sup> Tuti soi to Kamirei Berorong foi aweu, mayeai kife rahutufoia tuti niari kobui na aisufoi tuti saha weduari na segeli. Ambori wiro pempamu kaiwasa na nunei ahang kaha, paria defuina piaura wering (1.000) fo kai. Wiataia defuina piaura wering foa kaia fo, we-waifoi sawini tourai aha.

<sup>4</sup> Ainanaya iwati kadera mananu fo, tuti mano eminohi naya fosa esobu mambiri we ehutu kaiwo. Iwati inontarai manea kontai enumian-inufo, amani inontaraio raminde emadu kariri Yesusi tuti ewuwu Allai ne Kaiwofo wedaya kaiwasa eferangkahutu eramikanangfoa fosa. Ea mani, inontarai wiro esomi we andowa kerira foi tuti ne aririwangfoi kaha, tuti wiro esobu andowafoi ne fiainawiafo na erewomifo ete na ewaramifo kaha. Esuwi na marareha rorong foi etarang aha tuti eru wang mananu fo ria Kristusi paria defuina piaura wering (1.000). <sup>5</sup> Inontaraio esuwi na marareha rorong fo we

eminohi etarang defuina piaura wering nanisa deinawi mansuwi-suwi reantenang fo finana. Wape inontarai emararehao wiro esuwi konta kaha fosa, ewatai paria defuina piaura wering foa kai akawuru wori esuwi ki.<sup>6</sup> Inontarai mano esuwi na mansuwi-suwi reantenang fe nanisa emararebanai tuti Allai mioansa paria. Weo wiro esodai Marareha Weberu foi kaha. Weo Marareha Weberu foi wiro wemambiriw we kiasa kaha. Ampefe eweimami we Allai tuti Kristusi, tuti eru mananu ria Kristusi paria defuina piaura wering (1.000).

### *Allai miungno Saminseni tuti ne raifosa*

<sup>7</sup> Defuina piaura wering (1.000) foa kaifo, we-waifoi fiorehu wai besi fo weru Saminseni tuti sawini weru aitamu wiatai nai foi. <sup>8</sup> Ainanaya Saminseni kiarai weru katai wiatai nai foi ariei, tuti da we pempamu kaiwasa na nunei sentenang amani kaiwasa na nu fubao uwonomi Gogi tuti Magogi, tuti fianduhisa we emamuna. Kaiwasa fuba fianduhi nani ato afonsoi kaha, ne tarai toyari ninuaing na nafareng. <sup>9</sup> Inontarai nanisa esinsung mai katai na nunei sentenang pariao era wa esoru katai Allai ne inontaraifosa eminohi nai foi, amani bendario enewawuti foi, we emamuna wei. Manamo Allai su adia bei na rorafaisi meu kasosara ehaia. <sup>10</sup> Mae Saminseni, amani mano pempamuska foi, wewai manei soi to Rawanang Adia foi, amani adiao belerang deng-gararu foi. Katai nani dino raminde wewaifoi so andowa kerira foi tuti ne nabi tarai kaha foia unayai nai ne. Na katai nani esodai dadira fiabai paria fo nai, diru rahida we fitawafa.

*Aiboi wefuiai pario Allai dohonai we inontarai  
eharira fosa*

<sup>11</sup> Mayeai iwati kadera mananu fiabai biua bei, tuti Seng Allai minohi nai. Na arongreafo, rorafaisi tuti nunei unai na tantuma tuti wiro watiao na weai ahang kaha. <sup>12-13</sup> Tuti iwati inontarai emarareha fosa, katui ete fuba, etoari na arongreafo. Inontarai emarareha na rawanang fosa, mano enayai na Mararehafoi tuti na Aitamu Marareha Rorong foi, inontarai nanisa kiai, era wa etoari na Allai arongreafo we kiutu kaiwo karirisa. Mayeai iwati manei fiai buku soi kariri inontarai ene enari toa fo naya fo. Tuti fiai buku siai bei kontai amani, Bukuo soi kariri mano esobu Waidani fosa nai foi. Ainanaya Allai dohong aiboifo we inontarai emarareha fosa kariri fianai aino soi na bukufoi kariri ene etohong toa fo nanai. <sup>14</sup> Mayeai wewafoi so Mararehafoi tuti Aitamu Marareha Rorong foi to Rawanang Adia foi aweu. Rawanang Adia nini mani Marareha Weberu foi dine. <sup>15</sup> Mandoni dino wonongfo watai na Buku soi kariri mano esobu Waidani fosa foi kaha mani, wenani kontai Allai soi to Rawanang Adia foi.

## 21

*Nu weworu*

<sup>1</sup> Mayeai iwati Rora Weworu bei aha, tuti nunei weworu bei aha. Weo nunei bo reantennang foi niai ampa. Rawanangfo kontai bireri ampa. <sup>2</sup> Tuti iwati Bendari Mirarebanai, amani bendari Yerusalem weworu foi, Allai suki na rorafaisi meu. Bendari nani ne tarai toyari

kadawing mandirauo mirandinia meinenan we ne mangfoi. <sup>3</sup> Tuti tarahuo manei sahu na kadera mananu foi deyo, “Ninaia mani katai Allai minohi nai fi wiatai rahang inontarainesa ampa. Tuti minohi riasa, ambori yuaisa we ne inontaraifosa. Allai mantauni ambori weririasa tuti weSeng wesa. <sup>4</sup> Ambori dufi euremikurufo weru euremifo, wiro esodai mararehafoi ahang kaha, esai ahang kaha, etaidu ahang kaha, tuti enumiruainso emaninang na weai ahang kaha. Weo fi kiaio mamo foi niai ampa.”

<sup>5</sup> Ainanaya mano minohi na kadera mananu foi medu deyo, “Boti ma! Ninaia mani inari fi fuba nini kiai weworu!” Tuti medu tubarai aha deyo, “Woi fianai aino imadurai we wau mau nanai, weo kaiwo nanai tarai tuti masi we meroasoai.”

<sup>6</sup> Mayeai medu we yau aha deyo, “Kai ampa! Yau mani, *Alfa* tuti *Omega* di yau, yau kontaio *Reantenang Pari* tuti *Fui Pari* di yau. Mandoni dino arongtataha mani, ambori yohong merehafo dunung ki, tuti mereha nanai yohong aroratai na waya urengno dohong kaiwasa eminohi etarang we fitawafa foi. <sup>7</sup> Mandoni dino doara mutu dirapa Saminseni mani, wenani sobu finanai karia yau ki, tuti ambori iruaisi we nehu kaisung tuti iweSeng wei ki. <sup>8</sup> Wape mano ematai we enari ne mai fosa, mano eroasoa kaha fosa, mano enari sasari kerira fosa, mano emung inontarai fosa, mano emaninawa funoma fosa, mano eha rawang fosa, mano esomi we seng tarai kaha fosa, mano etatofa biriu fosa, kaiwasa kerira fuba nani kiai ambori iso sa to Rawanang Adia webelerang denggararu foi aweu. Rawanang Adiai nani mani,

Marareha Weberu foi dinani.”

*Yerusalem weworu foi*

<sup>9</sup> Ainanaya wewai wefuiai pari foi, na wewai ituo eru rewanguai wenofi beitu sefang na Allai ne aiboi beitu fo, da ma medu we yau deyo, “Ro ma, ambori tura wa yeinawio Kadawing Mandirau foi we wau, amani Domba Antung foi ne wingno ambori dauti foi we wau.” <sup>10</sup> Ampafe Allai Nuaninufoi sensoni yau tuti wewaifoi kia yau to uai fiabai dedai beia. Na wanai deinawi Bendari Mirarebanai we yau, amani Yerusalem. Bendari nani biari na rorafaisi na Allai arongreafo meu. <sup>11</sup> Allai ne sambewaraio dadai fo wedaya bendarifo keiwewa toyari kamieio keiwewa ne harga dedai esahui we intani, tuti memarampoti toyari kasinai. <sup>12</sup> Bendarifoi ne taba kamieio dawariri foi fiabai tuti dedai, tuti ne rahutu suraya boru, wewai ewesuraya mandu ewaitawang weduarai na rahutu suraya boru nanai, amani mansiari-mansiari deitawang wedua rahutu bei. Tuti esoi inontarai Israeli fosa ewonomifo kariri ene riria suraya boru fo maino rahutu suraya boru fo, amani rahutu bei riria bei, rahutu bei aha mani riria bei. <sup>13</sup> Rahutu suraya boru nanai, botoru arong to do wanang murang foi, botoru arong to do wanampui foi, botoru aha mani arong to do wanansai foi, tuti botoru arong to do wanamba foi. <sup>14</sup> Taba kamiei foi ebauni sau kamiei suraya boru. Na kamiei suraya boru nanai, esoi Domba Antung foi ne rasuli suraya mandu fosa ewonomifo nayai, amani mansiari-mansiari wonongfo na kamiei bei.

<sup>15</sup> Wewai medu we yau nani, yu aititua enariri na emasi bei we titua bendarifoi, ne taba dawariri foi tuti ne rahutufo, nayai. <sup>16</sup> Bendarifoi wiatafo weaburuniai, amani deuroifo masih kariri tebafoi. Ampafe tituatia mani ne deuroifo deuroio stadia 12.000, amani kilometeri 2.200, tonanai kontai we ne tebafoi tuti ne dedaifo. <sup>17</sup> Mayeai titua taba kamieie foi aha mani, kehubang hasta 144, amani meteri piatorua wonang (66). Weo we-waifoi ne tituafokariri todoni inontaraine etituafi fo. <sup>18</sup> Taba kamieie nani enariri na kamieie keiwewa ne harga dedai esahui we intani, mae bendarifoi mantauni na emasi denteng pari foi. Emasi nani memarampoti toyari kasinai. <sup>19</sup> Kamieie ebaung tabafoi sauwi foi mani, na kamamieio keiwewa tuti ne harga dedai ureng suraya boru.

Amani kamieie ureng bo reantenang foi mani, na kamieie intani memarampoti,

bo boru foi na kamieio kehe rawanang esahui  
we nilami,

bo botoru foi na kamieie kehe rawanang tuti  
kehe ai reraung esahui we mirahi,

bo boa foi na kamieio kehe ai reraung esahui we  
zamrudi.

<sup>20</sup> Mae kamieie bo ring foi na kamieie berika tuti  
biua esahui we unami,

bo wonang foi na kamieie berika esahui we sardisi,

bo itu foi na kamieie bemining emasi esahui we  
ratna cempaka,

bo indeatoru foi na kamieie kehe adareti toyari  
mansoari aibong, esahui we berili,

bo indeata foi na kamieie bemining esahui we  
topasi,

bo sura foi na kamiei kehe bemining esahui we krisopasi,  
 bo suraya boyari foi na kamiei kehe toyari rawanang baba esahui we lazuardi,  
 mae kamiei bo suraya boru foi na kamieio ke-hea werawanderi foi esahui we kecubung.

**21** Rahutu suraya boru fo na mutiara suraya boru, amparef rahutu bei mani na mutiara fiabai bei, rahutu bei aha mani tonanai kontai. Mae bendarifoi ne rang fuba fo mani na emasio denteng pari fo, emasi nani memarampoti toyari kasinai.

**22** Seng Allai mano Wemambiri Sewa foi tuti Domba Antung foi uminohi na bendarifoi, amparef iwati Seng Allai ne Munufoi na bendarifoi kaha, weo Munu nani bireri ampa. **23** Bendari nani wiro wofoi ete embaifoi sambewari kaha, tonanai ki wape wiro memantiti na wea kaha, weo Allai ne sambewaraio dadai fo aino sambewari ne, tuti Domba Antung foi andino ne tarai wepadamarang sambewari konta ne. **24** Kaiwasa na doni kontai na nunei, ambori era na sambewaraio na bendarifoi nani ki, tuti mananufosa kontai ambori eha ene rafoi to bendarifoi ki. **25** Rahutu to bendarifoi afui nani wiro kafei na wea kaha, mae tifai pampang na rahida neungne, weo katai nani wiro diru na weai ahang kaha fefe. **26** Kaiwasa fuba nunei kiai ambori era wafui we etaparanding Allai tuti Domba Antung foi tuti esomi we suru nai. **27** Wape mano enari fi kia mamaya fosa, ete mano epampamu fosa, ete tanang tofino mano enari fi werarika fo, inontarai nanisa wiro esuai to bendarifoi afui kaha. Mae mano esuai afui fosa mani, mano ewonomifo

watai kawuru na Domba Antung foi ne Bukuo soi kariri mano esobu Waidani fosa foi.

## 22

### *Waya kia mai*

<sup>1</sup> Mayeai wewaifoi deinawi waya rowei we yau, wayao ne merehafoi manei dunumi mani minohi darang wenumainu dine. Wayafoi memarampotia wati tauremi nai toyari kasinai fenanai, tuti deda na kadera mananuo Allai tuti Domba Antung foi uminohi naya fo ariei. <sup>2</sup> Deda ariei mani deda riria rang fiabai foi rabuang tahi fo na bendarifoi. Aio bongfoi kaiwasa etani mani eminohi etarang we numainufoi, doa na wayafoi eneung dowani tuti donini. Defuina bei mani webong we besuraya beru, amani embai bei mani webong we beyari. Mae reraungfoi kaiwasa na nunei kiai ehari we enari ene maninangfoi nai. <sup>3</sup> Ampafe fiani kontai aino Allai deikangganiaia fo, wiro nayai na bendarifoi kaha. Allai tuti Domba Antung foi ambori une kadera mananu foi wiatai na bendarifoi, tuti Allai ne womingfosa ambori efatari ki. <sup>4</sup> Ewati te Allai urengfo tuti soi wonongfo na erewomifo ki. <sup>5</sup> Katai nani wiro diru na weai ahang kaha tuti wiro etohong we wofoi tuti padamarangfoi we sambewasa ahang kaha. Weo Seng Allai mantauni andino ne tarai we wo tuti padamarang we sambewasa ne. Tuti ambori eru wang mananu fo we fitawafa.

### *Seng Yesusi daraberahi aha ma fo*

<sup>6</sup> Ainanaya wewaifoi medu we yau deyo, “Kaiwo fuba taramuoi kiai nini, kaiwo tarai fine

tuti masi we meroasoai. Seng Allai mano sensoni ne nabifosa na Nuaninu Mirarebana foi, demi ne wewaine yau kawuru ma we yeinawiai we wau kariri fianai aino katu wo kawaria fo, ambori woi kaririai we ne womingfosa.”

<sup>7</sup> Yesusi medu deyo, “Metarami ma! Yemang ahang kahai mae ira ahera mau. Mandoni dino dohong kariri kaiwo fuba dotu na buku fi nini mani, sobu moanafo.”

<sup>8</sup> Tuti fi fuba nini kiai, yau Yohanesi, tarahu terai na tarahune tuti iwati terai na urehune kontai. Tarahuoaai tuti iwati fi fuba nini kaifo, itau aweu isangkapa awehubuka na wewaio deinawi finanai we yau foi arongreafo we isomi wei.

<sup>9</sup> Manamo medu we yau deyo, “Nana fanai! Weo yau kontaio Allai ne woming di yau kariri wau, tuti kariri nemu doroio ewenabi fosa tuti kariri kaiwasa fubao etohong kariri kaiwo areraio watai na buku fi ninisa. Ampefe womi te we Allai.”

<sup>10</sup> Ainanaya medu we yau aha deyo, “Wiro bodiwa kaiwo watai na buku fi nini fanai, weo rahidafe kikeu ampa, we fininai ambori kawari-aifa.

<sup>11</sup> Mandoni dino niari ne karirafo mani,  
niari pampangna,  
tuti mandoni dino niari fi werarika fo mani,  
tawing wenani niari pampang kontaia.  
Mandoni dino niari fi mai fo mani,  
wenani todoni kontai dohong kaririai pam-pang.  
Kontai mandoni dino mirarebana mani,  
wenani todoni kontaio mirarebanai pam-pang.”

<sup>12</sup> Yesusi medu deyo, “Metarami ma! Yemang ahang kahai mae ira ahera mau, ira tuti fiembaitane we yohonai we mansiari-mansiari kariri fi niari fo. <sup>13</sup> Yau mani *Alfa* tutu *Omega* di yau, yau kontaio *Reantenang Pari* tuti *Fui Pari* di yau.

<sup>14</sup> Mano eruai ene ansungfo ambori mararebana fosa mani, esobu moanafo ria Allai. Ea mani ambori Allai yoa wesa we etangno aibong na aio dohong kaiwasa eminohi etarang we numainu foi ki, tuti esuayai na rahutu fiabai foi to bendarifoi afui ki. <sup>15</sup> Wape inontarai mano emasi we ahusa we fiawera fosa, amani mano eha rawang fosa, emaninawa funoma fosa, emung inontarai fosa, esomi we seng tarai kaha fosa, epampamu na kaiwo emadura fo tuti na etohong toa fosa, kaiwasa fuba nani kiai enayai na borieifo.

<sup>16</sup> Yau, Yesusi, yenatu nehu wewaifi we mea meu wa, we deisaha kariri fi fuba nini we jemati-wai kiai ampa. Yau mani *Riria Na Dauti* di yau, tuti yau mani awaha *Ampario* denggarau fiabai foi di yau.”

<sup>17</sup> Allai Nuaninufoi tuti Domba Antung foi ne Kadawing Mandirau foi umadu we Seng Yesusi ureyo, “Ro ma!” Tuti mandoni kontaio tarao kaiwone mani todoni kontai medu deyo, “Ro ma!” Mandoni dino arongtataha tuti mandoni dino miaya mani da ma kia mereha wedaya kaiwasa eminohi etarang we fitawafa fo we dunung. Mereha nanai kia arorataifa, wiro biaita kaha.

*Kaiwo arera wefuiai pari kariri kaiwo na bukunei*

**18** Yau Yohanesi yeretawanaia mutu toninai we mandoni kontai andino tarao kaiwo watai na buku isoi fininai, kariri fianai aino ambori kawaria fo, amani yeretawanai tonina; Masino manei medu seru kaiwofeai siai weru kaiwo nina mani, Allai ambori dohong seru aiboi fimungno watai na ne buku fi ninai kontai wei ki. **19** Tuti manei medu ta weaifa ete gefora weaifa mani, Allai kontai kiutu fiembaitao deretawanai na buku fininai wei kontai ki, amani wirosobu katai we minohi na bendari mirarebana foi kaha, tuti dang aibongno manei dani mani wedayari minohi darang we numainufoi kaha foi.

**20** Mano medurai we kaiwo ninai kiai mani kaiwo tarai fine foi deyo, “Yo! Wiro yemang ahang kahai mae, ira ahera mau!” Antu! Seng Yesuse, ro ahera ma!

**21** Kadono Seng Yesusi dohong ne bengfo arora we Allai ne inontarainesa kiai! Antu!

## **Sempaisi Ne Kaiwo Mirarebanai New Testament in Ambai**

copyright © 2010 Wycliffe Bible Translators, Inc.

Language: Ambai

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Ambai

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a4b461f1-cd72-5074-9be0-b39efea15ceb